

Loma Tovetumagana Yadi Leta Paulo Givetokilumina

Kivemala

Melala Loma ani Loma kabemali yadi melala kaikaiwabuna, ada Itali anafafali wagaine gimiyamiya. Wadedeku Loma anatoveimeya lakaina anayegana Sisa yana ebamiya. Badi tovetumagana imiyamiya Loma wagaine ani tufodi meIsileli aku kaduwe tufodi keke meIsileli. Ada ida yadi leta ani Paulo givetokilumina malamala 57 wagaine tova-nai gimiyamiya Kolinita. Malamala moyaina ginuwauwa vaita gidanau Loma tovetumagana gida lemedi yana vewala wagaidiya e ada yadi vetumagana Yeisu wagaine ida kidonena. E aku tova tayuwe wagaine ani keke anafaiweya gidana faina badi keke meIsileli tovetumagana ivele-kavovo badi meIsileli tovetumagana ivemaufu faidiya, biyavo-dina imiyamiya. Ada Paulo analauboda verekavovo-nai gina nauwena Yelusalema adileme faine. E ada keke gidana Loma aku aiyada leta giimilina aku vavine anayegana Fibe ani givale ginawena. Paulo yana nuwanuwa leta-nai wagaine ani tovetumagana gina kivetunudi ke ina gugai iwakana, ada vona velemono ke tafalolo anaveimeya tunutunugina anakivemala ina vaina.

Vesiule kaduwe leta ananuwanuwa nafona.
(1:1-17)

Kaliva moyaida ani tokoyona, ada adalauboda
Yaubada yana vevonayavuga wagaine
matavuloga kana nuwagana. (1:18 - 3:20)

Keke veimeya anamatawalewale aku aiyada
Keliso anavetumagana wagaine kibababala
kana nuwagana. (3:21 - 4:25)

Keliso nodi kaveseyana ayo yawaida evaguna
anamiya faina. (5:1 - 8:39)

MeIsileli todibusoyoga nonogana aimo
Yaubada yana yoo gagana wagaidiya
gina seyewedi. (9:1 - 11:36)

Gavadewa tulina tulina ide tovetumagana
adalauboda faina. (12:1 - 15:13)

Paulo yana venuwadadana, yana vetalakafoi,
yana lauwage. (15:14 - 16:27)

¹ Iya Paulo, Yeisu Keliso yana togugai.
Yaubada givenuwadadaneku ke gaveafositolo
ada Iya seseliyeku[†] yana valeya iwakana
gana lulumamalena faina.

² Taidei valeya-nai ani tova tuwaina
Yaubada givonadabadabaye-vagaina ada yana
falofitayavo giawaveleveledi ke yana vona
ivetokilumina Buki Tabu wagaine.

³ Valeya taidei ani Natuna faine, Banae
givekaliva-mowa ke gitubuga Kini Deivida yana
tubudelideli wagaine-deya.

⁴ Ada tova-nai wayawaina gimiyamiya babi
wagaine, tova moyaina Tauna giseliyena Tamana
wagaine, ada Yaubada alikeya gisiveyawa-
vagilena. Taidei wagaine Yaubada yana

[†] 1:1 Gal 1:15

toyogineya givewaleda vaita Banae Natu-moena, Banae Yeisu Keliso yada Kauveya.†

⁵ Banae-nai yana nuwadogeya givenuwadadanema ada aveafositolo. Ime keke wa yama iwakana aku au amaveimeya givелеma e ada babi anakaliva adiyoo moyaidi† yama laumamala wagaine Keliso ina vetumaganena ke ina matawalewaleyena ada anayegana ina kikilakaina.

⁶ Ada taidei vona-nai ani kadu imi amilauboda. Faina Yaubada gidouwemi e ada moyaimi Yeisu Keliso yana yooyavo.

⁷ Imi moyaimi Loma wagaine ani Yaubada ginuwakabubuyemi velemonoada givenuwadadanemi yana kaliva tabutabumiyavo, ani wagaimiya gavetokiluma. Yaubada Tamada ke yada Kauveya Yeisu Keliso wa yadi nuwadoga ina lemelememi ada kaduwe aseasemi ina kikiveniwalovidi.

Paulo nuwanuwana ginana tovetumagana Loma wagaine gina madubodadi.

⁸⁻⁹ Keke gavana faina aku wa yaku aseawaega gagugai Yaubada faine ke Natuna Yeisu anavaleya iwakana galulumamalena. Ada Banae anayeganeya gavesiule yaku Yaubada wagaine imi faimiya† faina wavetumagana Yeisu Keliso wagaine, e ada kaliva fafali moyaina wagaidiya yami vetumagana anavaleya iifuifufuyedadanena.† Yaubada anafaiweya yaku vona gina awavelemoenayena, faina gialamanena gavaiyei tova gaveoveola imi faimiya. Tova

† 1:4 2Tim 2:8 † 1:5 Gal 2:7 † 1:8-9 Efes 1:16 † 1:8-9 1Tes 1:8

moyaina yaku veoveola Yaubada wagaine amiyegana gainanana.

¹⁰ Ada tova ke tova gaitoma seyana faine gaveoveola, tainei kai Yaubada gina nuwaawaegau mamauwe aga wai faikuya gina kivemeyameyaganina ke ganaela gana itami.†

¹¹ Faina nuwanuwaku velemoena ganaela gana itami, e ada wagaikuya Aluwaluwa Tabuna yana avetavetala aminuwakabubu tamo gina velemini, e ada wana toyogina yami vetumagana wagaine ayo yana wai wagaine wana naunau iwakana.

¹² Taidei anafaiweya yaku nuwanuwa e ada imi yami vetumagana wagaine Iya wana kiveasevatuku, kaduwe Iya yaku vetumagana wagaine imiyavo gana kiveasevatumi.

¹³ Tubuiyakuweyavo, nuwanuwaku wana alamanena ani tova ke tova gabalalava evona vaita ganaela gana madubodami.† Badi kaduwe keke meIsileli imiyamiya mali fafali moyaina wagaidiya ani valeya iwakana gavevewaledi ada yawaidi iawaegedi Yeisu wagaine, tainei vaita yaku faisewa guwana ganuwagana. E ada nuwanuwaku anafaiweya wagaimiya, maita yaku faisewa guwana gana itana. Ika, vaita gadaela gada itami aku gaitoma tufona isebodabodana yaku ela-nai analaba malinai.

¹⁴ Yaubada yana nuwadoga wagaine gidewa wagaikuya iwaka-moena, e ada galutovonina vaita ketowai lakaina faikuya aimo gimiyamiya. Tainei faina nuwanuwaku valeya iwakana

† 1:10 Lom 15:23-24 † 1:13 Gug 19:21

gana lumamalena kaliva moyaidi wagaidiya ke akuketowai gana tutulina. E ada badi meGiliki ada kadu badi keke meGiliki, ada badi gavega tonuwanuwa velemonoena kadu badi keke tonuwanuwa velemonoena ani wagaidiya gana lumamala.**

¹⁵ E ada nuwanuwaku lakaina gana lumamalena imi kadu wagaimiya Loma wagaine.

Valeya iwakana Yeisu faine.

¹⁶ Ada valeya iwakana keke gada vovomumuye,[†] faina tainei valeya-nai wagaine Yaubada yana toyogina giseyegemonena,[†] tainei badi gavega Keliso ivetumaganena ani gikibababaledi yadi koyona anamatavuloga wagaine-deya. Nago-moena ime meIsileli Yaubada avetumaganena ani gikibababalema aku muliya kaduwe imi keke meIsileli gikibababalemi.[†]

¹⁷ Faina Valeya Iwakana wagaine-deya Yaubada giivemogatalina gavaiyamu giawaveyegayeganeda ke giitaitada vaita keke tamo wa yada koyona Banae matane. Yeisu Keliso wagaine kavetumagana faina, ide

** 1:14 Tova tuwaina meLoma yadi tova veimeya fafali moyaina wagaidiya ani badi gavega meGiliki bonadi ke adigiduwa ialama-nena ani adiyegana lakaina ayo badi gavega keke ida alamane. Ada badi gavega isikulu ani adiyegana lakaina ada badi gavega keke ida sikulu. Aku Yaubada ani kaliva matatabuda gin-uwakabubuyeda, ada keke gida nuwanuwa gavaiyamu adayegana anatubuga. Taidei faina Paulo gilulumamala badi gavega adiyegana lakaidi ke badi adiyegana keke lakaidi ani wagaidiya.

[†] 1:16 Mak 8:38 [†] 1:16 1Kol 1:18 [†] 1:16 1Kol 1:24

tokoyona-mowa nonogana Yaubada givona ide faideya, givonaga, “Imi kaliva yegayegamiyavo.” Keke tamo wai kaduwe, au yada vetumagana gagana. Anafaiweya Buki Tabu wagaine yada yegayegana vuvuna faina givona, “Badi gavega yegayegadiyavo Yaubada matane ani yadi vetumagana wagaine ina miyamiya.” †

Yaubada yana nuwakoyo gikikiveyegemonina.

18 Aku Yaubada gimiyamiya gabameya ani yana nuwakoyo lakaina anamanini gikikiveyegemonina dewa koyona moyaina faidiya. Anafaiweya kaliva-dina Yaubada ivedomobubusena ada tova moyaina aseasediya ikoyokoyona.† Taide yadi dewa-dina koyodi wagaidiya Yaubada yana vona velemono anaalamana ani isebo-dana.

19 Ada adilauboda gina vemataavulogidi, faina gavana ida alamanena Yaubada faine ani bade-mowa giseyegemonena wagaidiya.

20 Gavaiyamu ialamane? Tainei yana ibuibubuna wagaidiya. Babi anaibuibubuna vaguvagu wagaine-deya ke ginunauwena tova malinai, kaliva moyaidi adifaiweya nuwadi gina malina vaita Yaubada yana toyogina au miyamiyani-vagina ada Banae ani velemono Yaubada. Yaubada anaita ke yana veuluva ani kaliva keke mata-moedi wagaine adifaiweya ina itanu wagadi aku anaitaita yana ibubuna wagaine iitanuwagana faina,† keke adifaiweya yadi seba inasei inavona, “Ime keke Yaubada

† 1:17 Abak 2:4, Gal 3:11, Ibel 10:38 † 1:18 Kol 3:5-6 † 1:20 Sam 19:1

ada alamane o kai adaita, e ada akoyokoyona.” Ika, badi keke wa yadi seba yadi dewa koyodi igugugaiyedi faidiya.

²¹ Velemoena badiyavo ani ialamanena Yaubada gimiyamiya nonogana keke-mowa ida awadavadava o kai ida vesivesiule wagaine. E aku gaitoma-kavokavovo adinuwanuwa wagaine tova moyaina iawaawaegedi. Tainei faina yadi nuwanuwa itufa-mowa ada vaita matadi ikoyo Yaubada yana nuwanuwa faine.†

²² Ivonavona vaita badi tonuwanuwa vele-moedi, e aku velemoena ivetokwawakwava,

²³ ada yadi awadavadava anaedaeda isivedav-edamana. Ada vaita Yaubada wa yana iwakana mamalina gimiyamiya-vagata ani anaawadavadava ida velevele e aku kilumina ibubudi ke ioduodu wagaidiya.† Kilumina-dina anafaiweya kaliva adiitaita, badi keke ida miyamiya-vagata, ada kaduwe vaita manuga anafaiweya ke ke-vakeva wa agedi anafaiweya ke kaduwe ke-vakeva yagayaganidiyavo anafaiweya ani wagaidiya ioduodu ke iawadavadavadi.

²⁴ Kaliva Yaubada idibusoyogena aku tainei dewa kwavakwava wagaine iawaegedi faina, Banae giatuegedi yadi nuwanuwa bwanebwaneledi aseasedi wagaidiya. E ada matadi giludigadigagi-moena ke taudiyavo vovodi keke ida vemoimoinedi aku ivegugaiye-kavokavovodi taudiyavo tubuiyadiyavo wagaidiya.

²⁵ Vona velemoena Yaubada faina ani isegena aku aiyada vefwayafwaya adinuwanuwa ive-

† 1:21 Efes 4:17-18 † 1:23 Sam 106:20

tumaganena. Ada gaitoma-dina ibuibubuna ani wagaidiya ioduodu ke igugai faidiya, e aku Yaubada Banae adiToibubuna ani keke wagaine ida awaegedi, Banae anayegana gilubodada kana kikalakaina tova keke anaebalauyabu. Ika anafaiweya.

²⁶ Aku tainei gaitoma-kavokavovo wagaidiya iawaegedi faina, dewa koyona nuwadi gidolana e ada Yaubada giatuegedi ke vovodi anavegugai gadawedawelo ananuwanuwa wagaine igugaiyena. Ada guwana-nai giyegemona ani yadi vevineyavo keke moganediyo nodi vovodi anavegugai tunutunugina wagaine ida vegugaiye Yaubada adilutovona giveledi anafaiweya, aku vevine vovodi ivegugaiyena mali vevine vovodi wagaidiya.

²⁷ Ada kaliva kaduwe idewa sidamana anafaiweya. Vovodi anavegugai tunutunugina vevine wagaidiya Yaubada adilutovona giveledi anafaiweya ani iilovena aku au mali kaliva wagaidiya imatadigadigaga-mowa ada kaliva ke kaliva nodi vovodi ivegugaiyena, wada ebavovomumu vele-moena.[†] Ada taidei dewa-nai ifaifaisewana faina, taudiyavo vovodi wagaidiya yadi sidamana fatana inuwanuwagana, sidamana-nai analauboda anafaiweya.

²⁸ Ada kaduwe Yaubada anaalamana vele-moena ivegaitoma-kavokavovoyena ada keke nuwanuwadi ina nuwanuwaye faina, Banae giawaegedi ke taudiyavo nuwanuwa yuyuvana ina veimeye-yabudi, e ada dewa koyo-moena keke kaliva adilauboda ani idewadewayedi.

[†] 1:27 Vei 18:22

²⁹ Tova moyaina yadi tova iwakadi inuwanuwagadi ada dewa koyona ina faifaisewadi. Biyavo-dina ani gaitoma koyodi ifaifaisewadi kaliva wagaidiya, giba moyaina iitaitaluvadigedi, nuwanuwadi kaliva ina ivegilagidi, gavana tulina tulina kaliva wagaidiya iitaitaluvadigedi e ada iagougedi faina, ada wagaidiya ivona nuwakoyo, ada wagaidiya ivefwayafwaya ke iawavekoyoyedi, ada badi au kaliva iluluvealikadi. Ada kaduwe iveyaveyaina,

³⁰ kaliva iawavekoyoyena e ada adiyegana ina kikivekoyona, Yaubada iagougena, ivovona awadamana, wa yadi nuwalaka mali kaliva iitaitatagodi, ada taudiyavo adiyegana ikikilakaina, gaitoma evagudi koyodi ikikiveyegemonidi, inadiyavo ke tamadiyavo keke ida vemoimoinedi,

³¹ yadi nuwanuwa itufa-mowa, yadi vonadabadaba iyaweyawelidi ada keke wa adivetumagana, ada keke maita kaliva ida nuwakabubuye o kai ida nuwakalikaliye.

³² Bademowa ialamanena velemonoena gavana Yaubada yana veimeya wagaine givona, ina kai gavakaliva gina dewadewa anafaiweya aga gilubodana anamatavuloga gina nuwagana ani alika, e aku auwe ikwageye igugugaiyena anafaiweya. Ada kaduwe gaitoma koyo-moena ani mali kaliva dewa-dina igugaiyedi ani iawaveiwakanedi.

2

Yaubada yana vonayavuga tunutunugina.

¹ Tainei faina o kai gaito uvonavona, “Iya gaitanuwigana badi ikoyona e ada matavuloga ida nuwaga,” ani una itaveyabini. Faina yadi dewa-nai koyona ani oye tauni kaduwe ufaifaisewana. Taine faina vona-nai o uvonavonayena badi faidiya, ani taine uvonavona tauni fainiya. Oyeninina uvona venuwadadanedi ani badiyavo anafaiweya o kadu ukoyona, e ada keke tamo gavana afaiweya unavone ayo tauni una awabababalini.

² E aku ide kaalamanena tova-nai Yaubada givona venuvenuwadadana badi ikoyokoyona anafaiweya ke gina vematavulogidi ani tainei yana vona venuwadadana-nai vuvuna ani yana nuwanuwa tunutunugina.

³ E ada oye vaita gaito ayo seyana kaliva yana koyona faidiya uvona venuvenuwadadana vaita Yaubada gina vematavulogena, aku o tauni ani dewa-dina anafaiweya ugugugaiyedi. Gavaiyamu, unuwanuwa vaita Yaubada yana matavuloga oye una osena? Keke-mowa afaiweya.

⁴ Yaubada bademowa wa yana nuwakalikali gidewa iwakana wagainiya. Ya koyona faina keke gida madulufata aku giatuvelailena. Aku gavaiyamu, yana nuwakalikalinai taidei kai gaitoma-kavokavovo wagainiya? Vaita uda alamanena Yaubada wa yana nuwakabubu nodi gibodabodani, nuwanuwana una nuwawilani ya dewa koyona wagaidiya-deya.

⁵ Aku oye udebaitoyoga ke asease gikuga faina, ya koyona ululuvelaka wagaine Yaubada yana nuwakoyo ukikivetubugi-moena, e ada tova

gielaelai ani keke gina vematavuloge-bikebikeni. Yana tova nuwakoyo wagaine yana vevon-ayavuga tunutunugina gina ivemogatalina

⁶ e ada kaliva seyana seyana fatana gina velenana anafaiweya yana gugai faina.†

⁷ Kaliva tufodi yadi nunu lakaina ani Yaubada gina awaveiwakanedi ayo Banae nodi ina kaiwabu ke nodi ina miyamiya-vagata e ada taidei faina tova moyaina wa yadi atuvefaila igugai iwakana, e, biyavo-dina ani yawai-vagata gina veledi.

⁸ Aku kaliva tufodi taudiyavo gaga faidiya inuwanuwa, ada Yaubada yana vona velemoena ke gavana tunutunugina ani idibusoyogena aku dewa koyona nuwadi givaina. Biyavo-dina ani aimo Yaubada yana nuwakoyo lakaina anamanini wagaine gina vematavulogidi.†

⁹ Aimoina tomiyababi seyana seyana gidewa koyona ani gina nuwagana vita lakaina ada miya koyo-moena. Taidei nagona gina yegemona meIsileli wagaidiya,** aku kaduwe gina yegemona badi keke meIsileli wagaidiya.

¹⁰ Aku badi igugugai iwakana ani Yaubada adiyegana gina kilakaidi ke gina vemoimoinedi ada nuwaniwalova gina veledi. Banae nagona gina gugaiyena taidei meIsileli faidiya, aku kaduwe badi keke meIsileli ani faidiya gina gugaiyena.

† 2:6 Mad 16:27

† 2:8 2Tes 1:8

** 2:9 MeIsileli ani

Yaubada yana veimeya bademowa-deya ivaina, veimeya-nai mamali-moena vetovetokilumina gimiyamiya, ada tova ke tova yana falofitayavo giimiimilidi kaliva wagaidiya ke iwewavewaledi yadi dewa koyona faidiya.

11 Faina Yaubada keke kaliva gidaita venuvenuwadadanedi adiitaita wagaidiya, kai yadi yoo o kai gabu ayo gida luluvisi, aku matatabudi giita aigaigabuyedi.†

12 Badi keke meIsileli ani keke Yaubada yana veimeya vetovetokilumina idavai Mosese wagaine ada keke ida alamane. Tainei faina Yaubada keke ginavona venuwadadanedi veimeya-nai wagaine. Aku gaitoma tufodi ani ialamanedi aku keke ida mulimuliyedi, e ada taide yadi koyona-dina faidiya inakwa.** Aku badi meIsileli ani Yaubada yana veimeya ivaina Mosese wagaine e aku ialamanena nonogana ikoyona. Taidei faina yana veimeya-nai wagaine ginavona venuwadadanedi e ada yadi koyona anafaiweya adimatavuloga ina nuwagana.

13 Waitana, gavega yegayegadiyavo Yaubada matane? Keke veimeya anatoalamana, aku veimeya anatomatawalewale† ani badi yegayegadiyavo Yaubada matane. Banae gaito Yaubada yana veimeya-nai giitaveyabina, banae faine Yaubada ginavona, “Iya matakuya ani banae yegayegana matatabuna, keke maita wa yana koyona.”

14 Badi keke meIsileli ani keke Yaubada yana veimeya vetovetokiluma idavai ada keke ida alamane, aku tova-nai taudiyavo yadi nuwanuwa wagaine ani gavana veimeya-nai givonavona ani imulimuliyena anafaiweya, ada keke wa adiveimeya vetovetokilumina nonogana

† 2:11 1Pi 1:17 ** 2:12 Vona-nai ‘inakwa’ ananuwanuwa ani keke Yaubada nodi ina miyamiya-vagata aku luludakadi Banae wagaine-deya ina miyami. † 2:13 Mad 7:21, Iyem 1:22

veimeya-nai ananuwanuwa iseyegemonena yadi dewa wagaidiya.

¹⁵ Kai dewa koyona ina gugaiyena, aga taudiyavo nuwafoudiya ina lutovonina vaita bademowa ikoyona. Aku kai inadewa iwakana aga kaduwe nuwafoudiya ina lutovonina vaita keke ida koyona ke yadi dewa tunutunugina. Ada badi ina lutovonina anafaiweya faina, veimeya-nai velemonoena aseasediya gimiyamiya ani yadi dewa wagaine iseyegemonena.

¹⁶ Taidei anafaiweya gina miyamiya vonayavuga anatova wagaine, Yaubada yada dewa sewasewavuyena ke yada nuwanuwakavu koyodi faidiya gina veimeya adamatavuloga faina.[†] Ada faisewa-nai itavenuvenuwadadana ada vematavuloga ani gimiyamiya Yeisu Keliso nimane ada Banae gina vegugaiyedi. Valeya iwakana galulumamalena ani taidei anafaiweya.

MeIsileli keke ida matawalewaleye veimeya-nai gielai Mosese wagaine-deya.

¹⁷ E aku imi meIsileli ani ganavona wagaimiya. Imi taumiyavo amiyegana wakikilakaina ke wadavadavami, wavonaga, "Ime meIsileli ani Yaubada yana kalivayavo. Banae yana veimeya givema, ada wagaidiya atunutunuvala. Ada velemonoena Banae ime nodi avetubuiyana seyana.

¹⁸ Bademowa veimeya-dina wagaidiya ive-walema, e ada Yaubada yana nuwanuwa aala-manena ada amafaiweya dewa iwaka-moena ana venuwadadanena."

[†] 2:16 1Kol 4:5

19 Ani kaduwe wavonaga, “Ime velemoena aalamanena vaita badi gavega keke Yaubada ida alamane ani yuyuvaneya imiyamiya, e ada imeyavo ani yadi tokivetuvetunuga. Ada yadi nuwanuwa yuyuvanidi ani akikivemalidi.”

20 Wanuwaveyalaina evona Yaubada yana veimeya givelena Mosese ani imi wagaimiya faina, vaita gaitoma matatabuna waalamanedi velemoena ada gavana wavonavona ani ifufu velemoena. E ada tova moyaina wakivetuvetunugidi badi dewa iwakana ananuwanuwa wagaine ikabekabebena, ada wavewaledi badi kaliva-dina gavega anafaiweya biyabiyama keke Yaubada yana wai ida alamane.

21 E aku imi biyavo-mina mali kaliva wavevewaledi ani gavaiyamu, keke taumiyavo wada vewalemi? Imi gavega walulumamala ke wavonavonaga, “Keke una kiyafu!” aku imi taumiyavo gavaiyamu, wakiyakiyafu o kai keke?

22 Imi mali kaliva waawatadi wavonavona, “Keke wana udoudo,” aku imi taumiyavo ani dewa-nai anafaiweya wagaine wakoyokoyona! Imi waitaitadi kaliva ioduodu yaubada fwayafwaya adikilumina wagaidiya ada waawavekoyoye-moedi, e aku imi taumiyavo gavaiyamu, wakiyakiyafu lokoloko tayuwe yaubada fwayafwaya adimanuwa oduodu faina wagaidiya o keke?

23 Imi taumiyavo wakilakaimi, wavonaga, “Ime meIsileli ani Yaubada yana veimeya givema e ada amayegana lakaina,” nonogana yana veimeya-nai wayawelina, ada taidei wagaine Yaubada wavegaitoma-kavokavovoyena.

24 Taidei yami dewa-nai faina Buki Tabu wagaine ivetokilumina givona, “Imi meIsileli yami dewa koyona faina, Yaubada anayegana ani badi keke meIsileli adimwatuguya ivona awadamanena.” †

Tomogolota velemoena ani nuwainageda ana-gaitoma.

25 Kaduwe imi meIsileli ani kai yana veimeya wana matawalewaleyedi aga amitomogolota wa adiiwakana faimiya. Aku kai yana veimeya-dina wayaweyawelidi aga amitomogolota-dina ani gavana adiiwakana? Givegaitoma-kavokavovo. Yaubada matane imiyavo tomotomogoloimi ani au vaita keke tomotomogoloimi, ada keke wada vetuli badi keke meIsileli wagaidiya-deya, badi keke wa aditomogolota.†

26 Taidei faina kai badiyavo keke tomogolota-dina ida nuwaga aku Yaubada yana veimeya imatawalewaleyena ani Bana matane badi adi-ita itaita vaita wa aditomogolota, ada velemoena biyavo-dina ani yana kalivayavo.

27 Badi keke meIsileli ada keke vovo bubuna bwatana anatomogolota idavai, ani aimo vonayavuga anatoveya badi yadi yegayegana wagaine imi meIsileli ina seyegemonemi vaita amilauboda matavuloga wana nuwagana, faina imi Yaubada yana veimeya wayaweyawelina. Yaubada yana veimeya vetovetokilumina wavaina ke vovo bubuna bwatana

† 2:24 Ais 52:5, Isik 36:22 † 2:25 Eba 17:10-27, Iyeg 12:48, Luk 1:59 ke anaailabama adiebakivemala

anatomogolota wavaina, nonogana veimeya wayaweyawelina, aku badi kaliva-dina keke vovo bubuna bwatana anatomogolota idavai ani veimeya imatawalewaleyna. Taidei faina badiyavo ani imi meIsileli ina veiwakasegemi.

²⁸ Gavega Yaubada yana kalivayavo vele-moena? Kaliva-nai yegana Isileli giwaiwaina ada banae itomogoloina aku banae ani au keke veimeya anadewa gida mulimuliye e ani banae-nai keke kwana Isileli velemoena.

²⁹ Vekwana Isileli anadewa velemoena, taine nuwainagedeya gaitoma-nai. Ada tomogolota velemoena nodi seyana. Tainei keke vovo gagana yana gaitoma aku taine gaitoma-nai ani nuwainageda yana gaitoma. Tomogolota taide anafaiweya, veimeya ivetokilumina fefe wagaine ani keke anafata gina veleda, faina Aluwaluwa Tabuna gaga wagaine gielai, Banae anafata nuwainageda gina sevedavedamena.[†] Velemoena, badi kaliva-dina gavega tomogolota-nai ivaina ani adiawadavadava inuwanuwagadi Yaubada wagaine, keke kaliva-mowa wagaidiya.

3

¹ Kai tamo gaito taide gaitoma-nai faine ginavona, gina vonaga, “Kai badi meIsileli ani Yaubada keke gida awaveiwakanedi vovoda bubuna bwatana anatomogolota faina, aga gava iwakana wagaine meIsileli iveiwakasegedi badi keke meIsileli? Ada gavana anaiwakana tamo gida yegemo vovo bubuna anatomogolota wagaine?”

[†] 2:29 Kol 2:11

² Iya gadavona, “Badiyavo ani meIsileli faina, wai moyaina wagaidiya yadi iwakana inuwanuwagadi. Nagona ani Yaubada Bana wa yana vetumagana Tauna bona-moena gisena badi meIsileli nimadiya ke ina itaveyabina.” **

³ Aku MeIsileli tufodi Yaubada yana vona keke wa yadi vetumagana ida vemoimoine yadi vonadabadaba anafaiweya. Ada kai tamo gaito gida toolidadana, gidavona, “Badi yadi vonadabadaba Yaubada wagaine ani keke ida itaveyabi faina, gavaiyamu? Ananuwanuwa vaita Yaubada kaduwe Tauna yana vonadabadaba keke gina itaveyabi?” †

⁴ Iya gada lufata, “Keke-bamowa! Au velemono keke tainei ananuwanuwa anafaiweya. Kai kaliva matatabu-moedi ida vefwayafwaya aku au Yaubada keke maita gida vefwayafwaya. Yana vona matatabuna au tunutunugidi, ada gavaiyamu givona, tainei gigugaiyena. Anafaiweya yana Buki wagaine ivetokilumina givonaga,

‘Yaubada, Oye unavona ada kaliva moyaidi ina itanuwagana vaita ya vona-dina au velemono. Kai kaliva ina awavekoyoyeni vaita keke udavona venuvenuwadadana tunutunugina yadi koyona faidiya, aga ya vona venuvenuwadadana una seyegemonena ke una veiwaka-tagodi.’ ” †

** **3:2** Gavana meIsileli yadi iwakana faina Paulo giifufuyedi ani kaduwe givonaye-vagiledi. (Lom 9:4-5) † **3:3** 2Tim 2:13 † **3:4** Sam 51:4

⁵ Aku tamo gaito yana nuwanuwa anafaiweya kaliva-mowa ani ginavona vaita Yaubada yana dewa keke tunutunugina ada ginavona kwavakwava, ginavona, “Kai adewadewa koyona aga tainei iwakana, faina kaliva yama dewa ina itaitana aku Yaubada yana dewa yegayega-vagaina ina maduitana inavona, ‘Yaubada yana dewa ani yegayega-vagaina, keke anafaiweya badi yadi dewa.’ E aku gavaiyamu ada Banae ginuwakoyo wagaideya ada yada dewa koyona faina givemataavulogeda? Yana dewa keke tunutunugina. E ada gavaiyamu kada nuwanuwa? Vaita Yaubada Banae kaliva yada dewa koyona faina givemataavulogida ani yana dewa keke tunutunugina?”

⁶ Keke! Au keke-mowa. Keke kanavona vaita Yaubada gigugai tunutunugina. Kai Banae keke tunutunugina, aga keke anafata tomiyababi moyaida gina vevonayavugida ada mataavuloga ginasena wagaideya yada dewa faina.

⁷ Kai tamo gaito gidavona sidamana, gidavona, “Iya yaku vefwayafwaya kaliva iitaitanuwigana aku kadu Yaubada yana vona ani au velemoena iitaitanuwigana. Ada tova-nai ina itaveluveyedi, Yaubada yana vona velemoena imadumaduitana ani mamalina velemoena wagaidiya. E ada Banae anayegana ikikilakaina. Aku gavaiyamu-yo yaku vefwayafwaya Yaubada yana kaiwabu gikivetubugina nonogana Iya aimo vaita tokoyona anafaiweya e ada akulauboda mataavuloga gana nuwigana?”

⁸ Kai taide vona kwavakwava wanuwanuwayedi vaita vona velemoena, e aga

au taidei wada vona gagana, “Ime ana koyokoyona e ada yama koyona wagaine kaliva ina itana vaita Yaubada ani iwaka-vagaina.” Taidei nuwanuwadina ani velemoena fwaya, aku kaliva tufodi nuwanuwadi akuyegana ina kivekoyona e ada iveveloiku evona vaita gadavona taidei anafaiweya. Badi kaliva-dina ani gilubodadi adimatavuloga ina nuwagana.

Keke seyana gaito toyegayegana Yaubada matane.

⁹ Kai tainei anafaiweya aga gavaiyamu kadavona? Gavaiyamu yami nuwanuwa, badi meIsileli ani iwaka-vagaidi ayo badi keke meIsileli? Keke tainei anafaiweya. Iya bademowa gamadu vonemi ide moyaida ani adaita seya-moena. Badi meIsileli ada badi keke meIsileli ani moyaida kakoyokoyona,[†] ada yada koyona-dina faidiya Yaubada yana matavuloga ani ide adalauboda.

¹⁰ Anafaiweya tova tuwaina ivetokilumina Yaubada yana Buki wagaine, givona,

“Keke seyana gaito yegayegana Yaubada matane, au keke tamō gaito.

¹¹ Keke seyana gaito nuwana gidamali Yaubada yana vona velemoena faina. Keke seyana gaito nuwanuwana Yaubada gina alamane, keke.

¹² Kaliva matatabudi Yaubada yana wai idibusoyogena, ada taidei yadi dewa-nai wagaine

[†] 3:9 Lom 3:23

adiyegana taudiyavo ivegaitoma-
kavokavovoyedi.

Keke seyana gaito gida gugai iwakana, au
keke

tamo gaito.†

13 Yadi vona moyaina ani koyona e ada
adinogala ani vaita lada magana anafaiweya
giyegeyegemona didikula giamawana ada gi-
afolena wagaine,

ada bonadi ani matatabuna fwaya gaga
analo.†

Yadi vona moyaina ani vaita tuva golagolana
anafaiweya.†

14 Yadi nuwanuwa koyo-vagaidi faina,
vona koyokoyo wagaine awadi gimaga.†

15 Badi imamadu manini-mowa ke kaliva
nodi ivemunumunuga evona ina luvealikadi.

16 Gadedeku inaunau ani iluluveyawaliyau
ke kaliva kokoyodiyavo inuwanuwavita-
mowa.

17 Badi keke ida alamane gavaiyamu
kaliva nodi ina vetubuiyana ke
ina miyaniwalova.†

18 Ada nuwainagediya keke maita
Yaubada ida matause e ada ida vemoimoina.”

†

Ide kaliva yada dewa anafaiweya e ada Yaubada
givona anafaiweya ada ivetokilumina yana Buki
wagaine.

† 3:12 Sam 14:1-3, 53:1-3, Tol 7:20 † 3:13 Sam 5:9 † 3:13 Sam
140:3 † 3:14 Sam 10:7 † 3:17 Ais 59:7-8 † 3:18 Sam 36:1

19 Aku keke wada nuwanuwa vaita vona taidei ani badi keke meIsileli gagana adilauboda. Keke-mowa. Ida badi meIsileli kaduwe adilauboda. Faina kaalamanena ani Yaubada yana veimeya matatabuna, badi veimeya-dina gisedi meIsileli wagaidiya ke ina muliyedi. E aku keke ida muliyedi. Taidei faine kaliva matatabuda gavega babi taide wagaine, veimeya gimiyamiya ke gina vewalayeda vaita wa yada koyona moyaida kana mididi Yaubada matane ada keke maita wa yada seba, au moyaida kana veyamata.

20 Faina Yaubada yana veimeya anamatawalewale wagaine keke tamo gaito ginami yegayegana Yaubada matane, au velemoena keke.† Veimeya-nai gimiyamiya ke gikivealamanida kakoyona.

Yada yegayegana Yaubada matane ani Yeisu anavetumagana wagaine.

21 E aku tova malinai yada yegayegana Yaubada matane faine ani wai tulina givemogatalina wagaideya, wai-nai keke Mosese yana veimeya anamatawalewale wagaine gida vevuvu. Taidei wai-nai ani tova tuwaina Mosese givetokiluma faine veimeya-dina Yaubada givelena wagaidiya, ada kaduwe falofitayavo ivetokiluma faine.

22 E, wai-nai vuvuna ani Yeisu anavetumagana. Tova-nai ideyavo Yeisu Keliso kavetumaganena, Yaubada yana yegayegana kavaina, e ada ide faideya givona, “Badi yaku kaliva yegayegadiyavo, keke tamo wa yadi koyona.” Ide matatabuda Keliso kavetumaganena ani

† 3:20 Gal 2:16

wagaideya taidei yegayegana-nai Yaubada giveleveleda,† faina Banae wagaine ani keke anatulina kai meIsileli o keke meIsileli.†

²³ Faina ide matatabuda koyona kagugaiyena ada adaita bamubamuida Yaubada yana iwakana mamalina wagaine. Yaubada wa yana iwakana mamalina gimiyamiya, ada ide gilubodada kaduwe yana iwakana mamalina wagaine kada miyamiya, aku ide yada koyona faina, kabamuina.

²⁴ Ide moyaida yada koyona wagaidiya ani vaita yogoyogodeyavo kamiyamiya, ada keke maita yada dewa tunutunugina o kai yada gugai iwakana ayo wagaidiya nuwakalikali kada nuwaga. E aku Yeisu Keliso nodi kaveseyana faina, gitutuveobuda,** e ada Yaubada yana nuwadogeya giseda yegayegadeyavo Banae matane.†

²⁵ Yaubada Yeisu Keliso giseyegemonena kaliva wagaideya ke gina alika e ada yana alika-nai wagaine yada koyona anamatavuloga giwaina. Taidei wagaine Yaubada nuwana gina bubuna ke yana nuwakoyo yada koyona faidiya ani gina avaina.† E ada kai kana vetumaganena Keliso dayagina yana madu wagaine yada koyona adilaufata giwaina, aga yada koyona-dina adivenuwaega kana nuwagadi. Taidei anafaiweya gigugai e ada gina seyegemonena vaita Tamana yana dewa kaliva wagaidiya ani tunutunugina.

† **3:22** Lom 1:17 † **3:22** Lom 3:9 ** **3:24** Vona-nai 'gitutuveobuda' ananuwanuwa ani kaliva moyaidi yadi koyona faina yogoyogodiyavo imiyamiya, e aku Yeisu yawaina giawaegena e ada gina etoyavudi. † **3:24** Efes 2:8 † **3:25** 1Iyo 4:10

Faina tova tuwaina kaliva yadi dewa ani koyona aku auwe Banae giatuvefailedi ada keke gida madulufata, faina Banae gialamanena aimo koyona-dina Keliso gina fatadi taidei yana alika wagaine.

²⁶ E, Yaubada Natuna Yeisu giawaegena alika wagaine kaliva faideya e ada tova malinai yana dewa yegayegana givewaleda ke kana alamanena ani Yaubada yana dewa velemoena yegayegana. Kaduwe, givewaleda vaita Banae analaubodamowa badi gavega ivetumagana Yeisu wagaine ani yadi koyona gina venuwaegedi ke ginasedi yegayegadiyavo Bana matane.

²⁷ E ada gavaiyamu, adafaiweya taudeyavo kana kilakaida vaita ide yegayegadeyavo Yaubada matane? Keke. Keke-mowa gida lubodada taudeyavo kana davadavada, faina yada yegayegana Yaubada matane ani keke yana veimeya kamatawalewaleyena faina aku velemoena Yeisu anavetumagana wagaine.

²⁸ E ada taidei ifufu-nai ananuwanuwa taidei anafaiweya. Yaubada giseda yegayegadeyavo Banae matane, ani keke veimeya kamatawalewaledi wagaine aku aiyada Yeisu kavetumaganena wagaine.†

²⁹ Kaduwe imi gavaiyamu yami nuwanuwa? Vaita badi meIsileli gaga ani adilo! Yaubada faidiya gimiyamiya ke badiyavo gaga gina kibababaledi, aiyo? Keke-mowa. Banae kaduwe gimiyamiya badi keke meIsileli faidiya.†

³⁰ Faina Yaubada ani seya-moena,† ada

† 3:28 Gal 2:16 † 3:29 Lom 10:12 † 3:30 Gal 3:20

wai seya-moena gisena ide kaliva moyaida yada yegayegana faina, badi meIsileli vovodi bubuna bwatana itomogoloina ada kadu badi keke meIsileli badi tomogolota anagiduwa keke ida muliye. Ada taide wai-nai ani taidei anafaiweya. Badi gavega ina vetumagana Yeisu wagaine ani Yaubada Tauna gina awaveiwakanedi ke ginasedi yegayegadiyavo Bana matane.

³¹ E ada taidei vewala-nai vetumagana gaga faina ani gavaiyamu, vaita Yaubada yana veimeya anamatawalewale kavegaitomakavokavovoyena? Keke, keke-mowa. Aku aiyada yana veimeya-dina kaawavelemoenayedi.

4

Ebelaamo yana vetumagana ide yada ebaita.

¹ E aku kana nuwanuwayena badi meIsileli tamadi lakaina nagona Ebelaamo, banae adi-unuma givevuvuna. Yana yegayegana Yaubada matane, gadedeku wagaine giela o gavaiyamu ginuwaga?

² Kai tova moyaina yana dewa iwakana gide-wadewayena e ada Yaubada gisena yegayegana Banae matane, aiyo? Keke. Kai anafaiweya aga bana wa vuvuna ke anafata gina gakaikai tauna faine, aku Yaubada matane keke-mowa wa yana vuvu ke gina gakaikai tauna faine.

³ Ada yana yegayegana faina, Buki Tabu wagaine ivetokilumina ani givonaga,

“Ebelaamo ani Yaubada givetumaganena,
ada
yana vetumagana faina, Yaubada

giawaveiwakanena ke givona banae faine,
gionaga, 'Banae yegayegana Iya
matakuya.' " †

⁴ Wana itana, kai kaliva yana faisewa faina fatana gina vaina, aga wada fatana-nai ani keke ananuwakabubu aku au ananuwanuwa ani gavana givaina wada yana faisewa guwana.

⁵ Aku yada yegayegana Yaubada matane ani anawai tulina. Badi gavega keke ida tunuvala taudiyavo yadi gugai ke taudiyavo yadi dewa iwakana wagaidiya aku au ivetumagana-mowa, ani Yaubada yadi vetumagana giitadi ada taidei faina ginasedi yegayegadiyavo Banae matane. Faina Banae ani tokoyona yadi koyona givevenuwaegedi ke gisesedi yegayegadiyavo Banae matane.

⁶ Kaduwe anafaiweya Kini Deivida givetokilumina vaita biyavo-dina yegayegadiyavo Yaubada matane ani wa yadi vemwamwala lakaina. Givona vaita badi gavega yadi yegayegana faina ani keke tamo gavana ida gugai e ada fata idavai, aku au yadi vetumagana gaga faina ada Yaubada gisedi yegayegadiyavo Banae matane.

⁷ Givona,

"Badi gavega yadi dewa koyona Yaubada
givenuwaegedi ke
yadi koyona-dina givenuwavuluyedi
ani yadi vemwamwala gavatubuga!

⁸ Gavega Yaubada keke gida nuwenuwedi
vaita

† 4:3 Eba 15:6, Lom 4:9,22, Gal 3:6, Iyem 2:23

wa yadi koyona ani yadi vemwamwala gav-
vatubuga!" †

⁹ Taidei ebavemwamwala-nai Deivida givonayena ani gavaiyamu anaalamana, kai badi meIsileli vovodi bubuna bwatana itomogoloina, ani badiyavo gaga faidiya, o kai badi keke meIsileli kaduwe nodi, badi tomogolota anagiduwa keke ida muliye? Ika, moyaida nodi adalauboda kana vemwamwala, faina ina yada vetumagana wagaine. Yaku ifufu bademowa wanogalina, gavona vaita Ebelaamo givetumagana Yaubada wagaine, ada yana vetumagana faina Yaubada giawaveiwakanena ke gisena yegayegana Banae matane.

¹⁰ Gavatoveya Ebelaamo anaawaveyegayegana ginuwaga? Tova-nai vovona bubuna bwatana itomogoloina wagaine o kai aimo keke ida tomogoloi wagaine? Velemoena ani nagona Yaubada gisena yegayegana aku muliya e vovona bwatana itomogoloina.

¹¹ Ika, Ebelaamo aimo keke vovona bubuna bwatana ida tomogoloi aku Yaubada givetumaganena, e ada Yaubada giawaveiwakanena ke gisena yegayegana Banae matane. Ada aimo Yaubada giveimeyena ke vovona bubuna bwatana itomogoloina, tainei yana iyaiyaya yana veyegayegana faina. Taidei anafaiweya giyegemona e ada badi gavega keke vovodi bubuna bwatana tomotomogoloidi aku Yaubada ivetumaganena, ani yadi vetumagana wagaine badiyavo kaduwe Yaubada gisesedi

† 4:8 Sam 32:1-2

yegayegadiyavo Banae matane. E ada Ebelaamo ani badi tamadi nagona.

¹² Ada kaduwe anafaiweya banae Ebelaamo ani bana meIsileli tamadi, badi kaliva-dina keke ida nuwaga tomogolota gagana aku kaduwe ive-tumagana. E ani, yadi vetumagana-nai wagaine tamadi Ebelaamo yana vetumagana anawai imulimuliyena, wai-nai Ebelaamo gimuliyena aimo keke tomogolota gidavai anatova wagaine.

¹³ Tova tuwaina wagaine Yaubada givonadabadaba Ebelaamo wagaine, givonaga, “Oyeni ke ya tubudelideli† nodi babi taidei matatabuna gana velemini.” Yaubada taidei anafaiweya givonadabadaba, keke vaita Yaubada yana veimeya Mosese gina veleni ani veimeya-nai Ebelaamo gida matawalewaleye faina, aku aiyada givetumaganena, taidei faina gisena yegayegana Banae matane.

¹⁴ Gavaiyamu wanuwanuwa? Velemoena Yaubada givona vaita biyavo-dina gavega yana veimeya ina matawalewaleyena ani yana vonadabadaba guwana ina nuwagana? Keke, keke-mowa. Kai badi veimeya anatomatawalewale yana vonadabadaba guwana ina nuwagana, aga anaita vaita Yaubada anavetumagana ani guwana keke, ada Yaubada yana vonadabadaba au givegaitoma-kavokavovo.†

¹⁵ Yaubada yana veimeya-dina kaliva iyaweyawelidi faina, yana nuwakoyo ke yana matavuloga ani ielaelai wagaidiya. Kai keke tamo veimeya ida miyami, kaduwe keke tamo veimeya kaliva ida yaweyawelidi.† Aku veimeya

† 4:13 Gal 3:29 † 4:14 Gal 3:18 † 4:15 Lom 5:13

imiyamiya faina, veimeya-dina iyaweyawelidi.

¹⁶ Taidei faina Yaubada yana vonadabadaba kaliva inuwagana ani vetumagana wagaine. Ada ide tovetumagana ani tokoyona nonogana Yaubada yana nuwadogeya taidei yana vonadabadaba-nai anaiwakana givele-kavovoda. Ada kai yana vonadabadaba-nai ide gidavele-kavovoda, aga Ebelaamo yana tubudelideli matatabudi adifata tainei vonadabadaba-nai ina nuwagana. Vonadabadaba-nai ani keke badi kaliva-dina imiyamiya Mosese yana veimeya dibune gagana faidiya, aku kaduwe ide gavega wa yada vetumagana anafaiweya Ebelaamo ani faideya.[†] E, ani banae ide tovetumagana moyaida tamada nagona,

¹⁷ anafaiweya Yaubada gimaduvonayena Ebelaamo wagaine, givona, “Iya gavenuwadadaneni e ada una vetama babi anakaliva adiyoo moyaidi faidiya.” [†] E ada ideyavo gavega tovetumagana, ani Ebelaamo banae tamada Yaubada matane. Taidei Yaubada-nai wagaine Ebelaamo givetumagana, Tauna Banae ani toalika gisiveyawadi ada kaduwe Banae gaitoma moyaidi aimo keke ida miyami ani giifufuyedi anafaiweya vaita bademowa imiyamiya.

¹⁸ Waitana, Ebelaamo matane ani keke tamo vuvuna gida miyami wagaine Yaubada yana vona gida yegemo velemonoena ke yana tubudelideli ida vemoyai, e aku au wa yana nuwavetumagana giitaitaboda tova-nai wagaine babi anakaliva adiyoo moyaidi ina awavetamanena. Faina Yaubada bademowa givonena, givona, “Ya

[†] 4:16 Gal 3:7 [†] 4:17 Eba 17:5

tubudelideliyavo ina vemoyai taliya anamakama anafaiweya.” †

¹⁹ Ebelaamo bademowa givesilakai anamalamala vaita wani analedi (100), ada keke anafata kwamana tamo gina vetubu,† ada kaduwe vavinenena Sela kakalina† ada biyabiyama adiivi giabodana, e aku tauna vovona ada vavinena yana kakala ginuwenuwena wagaine, yana vetumagana keke gida kabekabebe.

²⁰ Keke gida venuwavogane o kai gida nuwakila Yaubada yana vonadabadaba-nai faine, aku aiyada givetumagane-moena ada au Yaubada anayegana gikilakaina ke giawadavadavana gaitoma-dina aimoina ina yegemona faina.

²¹ Gialamanena velemoena ani Yaubada wa yana toyogina, ada gavana givonadabadabayena ani anavelemoena ina yegemona.

²² Taidei anafaiweya Ebelaamo yana vetumagana e ada Yaubada giawaveiwakanena ke givona banae faine, givona, “Banae yegayegana Iya matakuya.” †

²³ Tainei vona-nai ivetokilumina Buki Tabu wagaine ani keke Ebelaamo gagana faine

²⁴ aku kaduwe ide faideya, ide Yaubada ginaseda yegayegadeyavo Banae matane, e, ide kaliva-dana kavetumaganena Banae-nai Yeisu yada Kauveya gisiveyawana alikeya.

²⁵ Yaubada giatuegena kaliva nimadiya ke iluvealikana yada koyona faidiya, ada yada yegayegana Yaubada matane faina, alikeya gisiveyawana.†

† 4:18 Eba 15:5 † 4:19 Ibel 11:12 † 4:19 Eba 11:30 † 4:22 Eba 15:6 † 4:25 Ais 53:5

5

Yeisu wagaine Yaubada nodi kana vetubuiyana.

¹ Ide Yeisu kavetumaganena faina, Yaubada yada koyona givenuwaegedi ada giawaveiwakaneda ke giseda yegayegadeyavo Bana matane, e ada ideyavo Yaubada nodi kaveyavo seyana ada miya niwalova kanuwagana. Taidei ani yada Kauveya Yeisu Keliso Banae gikivelaubodana ide faideya.

² Kaduwe Banae wagaine ide adafaiweya yada vetumagana wagaine Yaubada yana nuwadoga kana lulutovonina, ada taidei yana nuwadoga wagaine kamidimididi aku kaduwe kavemwamwala lakaina faina wa yada nuwavetumagana kaveitabodaboda Yaubada yana iwakana mamalina faine.

³ Ada keke yana iwakana mamalina gaga faina kada vemwamwala, aku kaduwe kavemwamwala faina uloulolo kanuwanuwagadi.[†] Faina kaalamanena kai taudeyavo kana awaegeda uloulolo wagaidiya, aga taidei ilemelemeda ke kana atuvefaila-mowa.

⁴ Ada kai kana atuatuvefaila-mowa wagaidiya aga taidei gina lemeda ke kana asekumaga, ada wa yada asekumaga yada nuwavetumagana adakibababala faina kana kidonena.

⁵ Ada kaalamanena yada nuwavetumagana keke kadase-kavovo, faina Yaubada giveleda Aluwaluwa Tabuna e ada Banae wagaine Yaubada yana nuwakabubu lakaina gibiwana wagaideya ani kalulutovonina nuwainagedeya.

[†] 5:3 Iyem 1:2-3

6 Waitana, tova-nai ide aimo koyona giveiveimeyeda ada keke wa yada toyogina ke taudeyavo kana kibababaleda, tova-nai analauboda wagaine Keliso gielai ke gialika faideya. Ide wa yada koyona ani keke maita anafaiweya Yaubada faina Banae yana dewa yegayega-vagaidi, aku au faideya giawaegena.

7 Yaubada yana nuwakabubu ide faideya ani lakai-vagaina ayo kaliva yadi nuwakabubu tubuiyadiyavo faidiya. Gavaiyamu, gavaiyei kaliva tubuiyadi anayava faine isefaga ke taudiyavo ina awaegedi alika wagaine? Kaliva toiye gagana. Kai tubuiyadi yana dewa yegayegana ada iwakana velemonoena ada inuwakabubuyena lakaina, aga wa yadi asewatu taudiyavo ina awaegedi bana faine ina alika, aiyo?

8 Aku Yaubada gikiveyegemonina Tauna yana nuwakabubu lakaina ide faideya ani taidei anafaiweya. Ide aimo tokoyona, aku Keliso faideya gialika.†

9 Keliso dayagina gimadu faideya ke kayegayegana Yaubada matane faina,† kaduwe kaalamanena velemonoena Banae gina kibababaleda Yaubada yana nuwakoyo wagaine-deya e ada yada koyona analaufata keke kana nuwaga.

10 Wana itana. Nagona ide Yaubada nibainavo nonogana Banae Tauna giveseyana-vagileda Natuna yana alika wagaine. Ada Natuna yana alika wagaine bademowa kaveseyana-

† 5:8 Iyo 3:16, 1Iyo 4:10 † 5:9 Efes 1:7

vagila Yaubada nodi faina, kaduwe velemoena Keliso wayawaina gimiyamiya faina, Banae anafata gina kibababale-yabuda.†

11 Ada keke adakibababala gagana kada nuwaga, aku kaduwe ani adafaiweya kana vemwamwala-mowa ke Yaubada kana miyalabilabinena yada Kauveya Yeisu Keliso wagaine-deya, Banae-nai yada vetubuiyana gikiveyegemonina e ada ide Yaubada nodi kaveseyana-vagila.

Adama wagaine alika giyegemona, aku Keliso wagaine ani yawai-vagata.

12 Ide Yaubada nodi kaveyavo ani faina kaduwe gana ifufu. Kaliva seyana yana koyona wagaine koyona givevuvu,† ada yana koyona-nai fatana ani alika.† Ada ide moyaida kakoyona faina, kaduwe alika gidamana tomiyababi moyaida wa-gaideya.

13 Tova tuwai-moena Yaubada yana veimeya aimo keke gidavele Mosese wagaine, tova-nai wagaine tomiyababi ikoyokoyona. Aku veimeya keke gida miyami faina, Yaubada kaliva yadi koyona keke gida nuwenuwedi vaita veimeya iyawelina.

14 Aku Adama** yana toveya ke gielai Mosese yana tova, alika kaliva giveiveimeyedi ke moyaidi ialialika. Biyavo-dina Yaubada yana

† 5:10 Kol 1:21-22 † 5:12 Eba 3:6-8 † 5:12 Lom 6:23

** 5:14 Vona-nai 'adama' ani vona Ibeliu, ada ananuwanuwa 'babi'. Ada kaliva-nai nagona Yaubada gimadububuna ani babi givegugaiyena ke gibubuna, e ada anayegana givelena 'Adama'. (Eba 1:26-28, 2:20)

veimeya keke ida yaweli anafaiweya Adama giyawelina, aku auwe ialika.** Aku bana Adama ani yada ebaita Keliso faine, Banae-nai aimo gina yegemona.†

¹⁵⁻¹⁶ Faina Adama ani banae kaliva anakaibe-mowa aku yana koyona wagaine ada kaliva moyaida alika kanuwagana. Aku Yeisu Keliso ani Banae kaduwe anakaibe-mowa aku yana faisewa ani kaliva moyaidi gilemedi, ada gikivemeyameyaganina ke Yaubada gina nuwakalikaliyedi ke wa yana nuwadoga gina lemelemedi. E ada Yaubada adanuwakabubu Banae Natuna givele-kavovoda ani vilena keke anafaiweya Adama yana koyona vilena, wada tulina. Faina wada Adama yana koyona seya-moena taine moyaida gikivekoyoda, ada taidei vuvuna-nai faine Yaubada matavuloga ginasena wagaideya. Aku tova-nai matatabuda Yaubada yana veimeya moyaina kagadibudibusoyogedi, aga auwe aku Yaubada yana nuwakabubu givele-kavovoda ke giawaveyegayeganeda, givona, “Yami koyona bademowa giavaina ada imi yegayegamiyavo matakuya.”

¹⁷ Kaliva seyana gikoyona faina, alika kaliva giveiveimeyedi ke moyaidi ialialika. Aku kadu Kaliva seyana wagaine ani yadi iwakana lakai-vagaina inuwagana, tainei Yaubada yana nuwadoga lakai-moena ada yana

** **5:14** Biyavo-dina Yaubada yana veimeya keke ida yaweli anafaiweya Adama giyawelina, faina badi yana veimeya iyaweyawelina aku imiya bavubavu-mowa faine. Aku bana Adama ani Yaubada yana veimeya gialamanena aku au giyawelina. † **5:14** 1Kol 15:45

nuwakabubu keke wa fatana e ani kaliva gisedi yegayegadiyavo Banae matane. E ada gavega moyaidi yana nuwakabubu-nai ina nuwagana ani ina vevetoyogina dewa koyona wagaidiya Kaliva seyana-nai wagaine, Banae Yeisu Keliso.

¹⁸ Yaku ifufu ananuwanuwa taidei anafaiweya. Kaliva seyana gaga yana koyona wagaine ada moyaida kakoyokoyona, ada faine Yaubada givona, “Yadi koyona fatana faina matavuloga gana veledi.” Aku kaduwe anafaiweya Keliso gugai yegayegana seyana gifaisewana faideya e ada guwana ani Yaubada kaliva gavega tovetumagana ani moyaida faideya givona, givonaga, “Badi yegayegadiyavo Iya matakuya.”[†] Taide anafaiweya ide yegayegadeyavo kanamiya-vagata.

¹⁹ E, kaliva seyana Yaubada yana veimeya gigadibusoyogena faina, guwana giyegemona kaliva moyaidi ikoyokoyona Yaubada matane. Aku kaliva seyana faine, Banae Keliso ani Yaubada yana nuwanuwa gimatawalewaleyena e ada kaliva tufona moyaidi Yaubada ginasedi yegayegadiyavo Banae matane.

²⁰ Yaubada yana veimeya Mosese givelena e ada veimeya-dina adiaiyawela wagaine kaliva ina itanu wagadi vaita taudiyavo yadi koyona ani lakai-moena. Aku kaliva yadi koyona giveinala lakaina aku Yaubada aimo wa yana nuwadoga lakai-moena gidewedewedi iwakana.

²¹ E ada anafaiweya koyona ani kaliva moyaida giveimeye tagotagoda ada ginagonagoyeda alika anawai wagaine, ani au taine anafaiweya Yaubada nuwanuwana yana nuwadoga wagaine

[†] 5:18 1Kol 15:22

gina veimeye-tagotagoda ada gina nagonagoyeda ke ginaseda yegayegadeyavo Banae matane. Taidei wagaine gina aliyeda yawai-vagata anawai Bana yada Kauveya Yeisu Keliso wagaine.[†]

6

Ide Keliso nodi kaveseyana faina, yada miya evaguna kanuwagana.

¹ E ada kai imi yaku vewala faine wana vonavona, wanavona, “Gavaiyamu, analauboda ada tova moyaina ide kana koyokoyona, e ada Yaubada yana nuwadoga gisai-mowa faina, gina gugai iwakana wagaideya ke yada koyona gina venuvenuwaegedi?”

² Iya gada lufata gadavona, “Keke, ada keke-mowa gida lubodada kaduwe dewa koyona kana gugaiyedi.” Gavaiyamu yami nuwanuwa, anafata toalika ina aladibidibiyena ayo ginadewa koyona? E, ide vaita toalika anafaiweya ada koyona adinuwanuwa wagaidiya ide vaita bademowa kaalika ke dewa koyona kaalikaloledi.

³ Gilubodana wana nuwaveyalaina vaita ide gavega kababitaizo ke Keliso Yeisu nodi kaveyoo-tamwai ani kaduwe babitaizo-nai wagaine ide Banae nodi kaalika-tamwai.

⁴ Keliso gialika ada itavuna, e kadu anafaiweya ide kababitaizo ada tainei anafaiweya vaita ide Yeisu nodi kaalika-tamwai ke nodi itavuda. Ide taidei anafaiweya kaalika, e ada

[†] 5:21 Lom 6:23

anafaiweya kaduwe Tamada Yaubada yana toyo-gineya ke yana iwakana mamalina wagaine Keliso gisiveyawa-vagilena alikeya, kaduwe anafaiweya ide gisiveyawa-vagileda e ada yawaida evaguna wagaine kana miyamiya.†

⁵ Taidei anafaiweya Banae nodi kaveyoo-tamwai yana alika wagaine faina, kaduwe anafaiweya kana veyoo-tamwai yana yawa-vagila wagaine.

⁶ Taidei kaalamanena ani yada nuwanuwa koyona tuwaina gimiyamiya, aku Yeisu kelose wagaine nodi kaalika-tamwai ani yada nuwanuwa-nai koyona nodi ikivebolagalagana e ada yada nuwanuwa-nai yana toyogina Yaubada gina luyawelina. E ada keke aimo koyona gina veiveimeyeda ke kana vetogugai yogoyogona wagaine.†

⁷ Faina banae gaito bademowa gialika Keliso nodi ani etoetoyavuna koyona wagaine-deya.

⁸ Ide Keliso nodi kaalika-tamwai faina, kave-tumagana ani kaduwe ide Banae nodi yawaida evaguna wagaine kana miyamiya.

⁹ Gavaiyamu kada alamane yawai-nai evaguna wagaine kana miyami? Faina Yaubada Keliso gisiveyawana alikeya, e ada keke kaduwe gina alika-vagila. Alika yana veimeya Banae wagaine giavaina, ada au giavai-moena.†

¹⁰ Taidei alika-nai Yeisu gialikena ani koyona fatana giluyabuna. Tova seya-moena gialika ada yana alika-nai ani au anafata-mowa.† E ada

† 6:4 Kol 2:12 † 6:6 Gal 2:19-20 † 6:9 Eba 1:17-18 † 6:10 1Pi 3:18

malinai taidei yawaina-nai wagaine gimiyamiya ani giawaege-vagaina Yaubada wagaine.

11 Taidei anafaiweya imi taumiyavo wana nuwenuwemi, wana vonaga, “Keliso nodi kaalika-tamwai faina, dewa koyona ananuwanuwa ani velemoena keke anafata gina veimeya-tagotagoda.” E, wana nuwenuwemi vaita bademowa alialikamiyavo aku yawaimi evaguna wamiyamiyanena ani Yaubada faine, yada Kauveya Yeisu Keliso wagaine.†

12 Tainei faina keke gida lubodami kaduwe dewa koyona adinuwanuwa vovomi gina veiveimeyedi e ada vovo anaitaluvadiga ke koyona tulina tulina wagaidiya wada awaawaegemi.

13 Kaduwe keke wana awaege vovomi talaina tamo e ada wagaine wana koyona, aku aiyada taumiyavo wana awaegemi Yaubada wagaine. Faina imi vaita alika wagaine wayawa-vagila, e ada gilubodami vovomi talaidi wana awaegedi Yaubada wagaine ke dewa yegayegana ina gugugaiyedi.†

14 E, Yaubada yana veimeya-dina givelena Mosese ani keke wada miyami dibudiya, aku malinai Yaubada yana nuwadoga yana ebaveimeya wagaine wamiyamiya. Taidei faina koyona keke aimo gina veimeye-tagotagomi. Keke-mowa.

Dewa tunutunugina faina kana vetogugai.

15 E aku yaku vewala faina kai tamo gaito gidavona, “Ide keke aimo Mosese yana veimeya dibune kada miyami, aku Yaubada yana nuwadoga

† 6:11 1Pi 2:24 † 6:13 Lom 12:1

anawai wagaine kamiyamiya. E ada taide faine ani gavaiyamu, iwakana faideya aimo koyona kana faifaisewadi, aiyo?”

Iya gada lufata, “Keke, keke-mowa!”†

¹⁶ Nuwanuwaku wana alamanena, gaito wavenuwadadanena ke taumiyavo wana awaegemi ada yana nuwanuwa wana matawalewaleyena, ani banae gina vetoveimeya wagaimiya ke imi bademowa wavetogugai yogoyogona banae wagaine.** E ada tainei anafaiweya, kai dewa koyona wana venuwadadanena, aga ina vaita koyona wagaine wavetogugai yogoyogona† e ada ginanau-deya wana alika.** O kai Yaubada anamatawalewale wana venuwadadanena, ina Yaubada wagaine wavetogugai yogoyogona ke yami yegayegana wana nuwagana Banae matane.

¹⁷ Aku kana vesiule Yaubada wagaine. Faina tuwaina koyona wagaine wavetogugai yogoyogona, aku tova malinai Keliso yana vewala ananuwanuwa velemonoena yana kalivayavo ive-walemi ani bademowa taumiyavo wa yami aseawaega nodi wadibumwaigena.

† **6:15** Lom 6:1 ** **6:16** Paulo yana tova wagaine meIsileli adigiduwa seyana ani kai tova moyaina kaliva seyana yana mani keke anafata yana miya faine, aga tauna gina vekimoneyena kaliva kaikaiwabuna wagaine ke gina vetogugai yogoyogona banae wagaine. Taidei wagaine bana anafata yawaina gina naunau ke gina miyamiya. E ada maita taidei wagaine Paulo vetogugai yogoyogona ananuwanuwa giifufuyena ada givegugaiyena koyona anavewala faina, ada kaduwe Yaubada anamatawalewale faine. † **6:16** Iyo 8:34 ** **6:16** Alik tainei ananuwanuwa ani ludaka-vagata Yaubada wagaine-deya.

18 Yaubada bademowa gietoyavumi koyona wagaine-deya e ada malinai imi dewa yegayegana anatogugai yogoyogomi.

19 Waitana, yaku nuwanuwa gaifufuyedi keke gida mamali wagaimiya, e ada ebaluvefota gasena ani togugai yogoyogona ke yana toveimeya wagaidiya. Taidei wagaine nuwami gina malina. Nago-moena imi vovomi waawaegemoedi e ada wavetogugai yogoyogona vovo ananuwanuwa anadewa koyona wagaine. Tova moyaina veimeya moyaina waawaegegedi ke yami koyona giveinala-mowa. E aku tova malinai ani amilauboda vovomi wana awaegemoedi e ada dewa yegayegana wagaine wana vetogugai yogoyogona. Taidei anafaiweya wana awaawaegemi e ada imi seseliyemi Yaubada faine.

20 Nago-moena imi vaita togugai yogoyogona nuwanuwa koyona faine, e ada dewa yegayegana keke gida veiveimeyemi ke ananuwanuwa keke maita wada nuwenuwe.†

21 Tayuwe tova-nai wagaine ani tamo gavana iwakana wanuwigana dewa-dina taidei wagaidiya? Keke-mowa. Badi adinuwaududu malinai ikivevovomumumi, ada adilaufata ani alika.†

22 Aku tova malinai Yaubada bademowa gietoyavumi koyona adinuwanuwa iveiveimeyemi wagaidiya-deya, e ada imi Yaubada yana togugai yogoyogomi. E ada guwana iwakana wanuwanuwigana ani yana lemeya imi seseliyemiyavo Banae faine e ada dewa

† 6:20 Iyo 8:36 † 6:21 Lom 7:5

yegayegana nuwami givaina, ada taidei guwana ani yawai-vagata.

²³ Faina koyona fatana ani alika, aku Yaubada yana nuwakabubu ani yawai-vagata giveda, faina ideyavo bademowa yada Kauveya Yeisu Keliso nodi kaveseyana.[†]

7

Miya evaguna faina Paulo ebaita gisena nagi wagaine.

¹ Tubuiyakuweyavo, Yaubada yana veimeya Mosese givelena faideya ani bademowa alanimiyavo, e aku gana ifufu wagaimiya. Imi veimeya ananuwanuwa waalamanena velemono, tainei kaliva seyana seyana wayawaina anatoveya ani veimeya tulina tulina ina veimeyena. Aku kai gina alika aga veimeya-dina gina avaina banae wagaine.

² Ebaita seyana nagi faina ani taidei anafai-weya. Kai vavine wa moganedi ada kai moganedi aimo wayawaina nodi ina miyamiya, aga vavinenadina taidei ani nagi anaveimeya dibune imiyamiya. Aku kai moganedi gina alika, aga vavine-dina ani nagi anaveimeya wagaine bade etoetoyavudi.

³ Taidei faina kai vavine-dina moganedi aimo wayawaina gina miyamiya aku badi ina segena ada inana mali kaliva wagaine inanagi, aga badi bade ikoyona ada taidei ivewagana udo. Aku kai moganedi gina alika, badi bademowa etoetoyavudi nagi anaveimeya taidei wagaine e ada

[†] 6:23 Lom 5:12,15

kai inanagi-vagila, aga keke badi toudo aku au adifaiweya mali kaliva vavinena ina miyamiya.

⁴ Kaduwe anafaiweya, Yaubada yana veimeya tuwaina givelena Mosese ani imi nagona dibune wamiyamiya, aku Keliso gialika anatoveya vaita imi nodi waalika-tamwai, e ada imiyavo ani etoetoyavumiyavo veimeya-nai wagaine. Ada imiyavo bade yavuyavumiyavo veimeya-nai wagaine faina, e amifaiweya kadu kaliva seyana yana kalivayavo, Banae ani Yeisu Keliso, kaliva-nai Yaubada gisiveyawa-vagilena alikeya.[†] E ada yami dewa iwakana wagaidiya guwami iwakadi wana seyegemonedi Yaubada faine.

⁵ Tuwaina ide taudeyavo gaga faideya kanuwanuwa ke nuwainagedeya koyona giveiveimeyeda. Yaubada yana veimeya Mosese givelena ani koyona ananuwanuwa itaitaluvadigana gisilakaina wagaideya, e ada vovoda wagaidiya kalulutovonidi vaita nuwanuwada gaitoma-dina kana gugugaiyedi. E ada guwada koyona kaseyegemonena ayo kanaunau alika anawai wagaine.[†]

⁶ Aku tova malinai ide Keliso nodi kaalika-tamwai faina, ide yavuyavudeyavo Yaubada yana veimeya wagaine. E ada yada faisewa Yaubada faine ani keke wai-nai tuwaina taine veimeya-dina buki wagaine ivetokilumina, aku wai evaguna wagaine taine Aluwaluwa Tabuna yana toyogineya.[†]

Yaubada yana veimeya ani yada koyona giseyegemonena.

[†] 7:4 Gal 2:19 [†] 7:5 Lom 6:21 [†] 7:6 Lom 8:2

⁷ E aku kai tamo gaito gidavona, “Aku kai veimeya-dina Yaubada Mosese givelena ani gaitoma koyodi, aiyo?”

Aku Iya gada lufata, gadavona, “Au keke, keke-mowa. Veimeya-dina iwakadi, faina ikivemalida koyona faina. Ebaita seyana, kai Yaubada yana veimeya keke gidavona, ‘Keke tamo gaito yana giba una italuvadige,’ † aga aimo kadu keke gada alamane vaita italuvadiga ani dewa koyona.

⁸ Bana koyona ani awata wagaine wai ginuwagana e ada nuwanuwa tulina tulina luvadigadi ani anafaiweya vaita gilivagudi e ada gitubuga-mowa wagaikuya. Kai veimeya tayuwe keke gida miyami, aga dewa koyona keke gada nuwenuwe, e ada yana toyogina vaita keke.

⁹ Tuwaina tova-nai aimo Yaubada yana veimeya keke gada alamane ani yawaiku faine ganuwanuwa vaita Iya kaliva iwakaku. Aku tova-nai veimeya-nai anaalamana gavaina, aga anafaiweya tayuwe luvadiga faina ananuwanuwa koyona wagaikuya ani giyegemona toyogina. E ada nuwaku gimalina vaita Iya gakoyokoyona ada galutovonina vaita yaku veyavo Yaubada nodi gayawelina, tainei vaita gaalika.

¹⁰ Ada veimeya-dina Yaubada gisedi ke yawaiku iwakana wagaine gana miyamiya, ani gaitanuwanuwa vaita iseku alika anawai wagaine.

¹¹ Faina taidei veimeya-nai gayawelina, ada bana koyona ani veimeya wagaine yana wai ginuwagana ada Iya gifwayanegenegeku, ada

† 7:7 Iyeg 20:17

yaku koyona faina fatana alika ada veimeya-nai gaiyawela wagaine, kanavona vaita koyona giluvealikaku.

¹² Taidei anafaiweya koyona gitoyogina faina, gavaiyamu kana nuwanuwa Yaubada yana veimeya faina? Veimeya ananuwanuwa matatabuna ani tabutabuna, ada veimeya tulina tulina kaduwe tabutabuna ada tunutunugina ke iwakana.”[†]

¹³ E ada kai tamo gaito gidavona, “Aku gavaiyamu-yo Yaubada yana veimeya Mosese givelena ani gaitoma iwakana nonogana veimeya-dina wagaidiya tauku anaalamana gavaina ada vaita gimunuku ke gaalika.”

Ada Iya gadavona, “Au keke-mowa. Aku aiyada Yaubada yana veimeya giveleda e ada kana itanuwagana vaita yada gugai koyona ani velemoena koyona. E, kana itana yana veimeya-dina iwakadi kayaweyawelidi faina, ide alika anawai wagaine kanaunau, e ada kanavona, ‘Yada koyona ani vona velemoena au gaitoma koyo-moena.’ ”

Nuwanuwa iwakadi ada nuwanuwa koyodi ani nuwainagedeya ivevelutaitaineda.

¹⁴ Ide kaalamanena ani Yaubada giveleda yana veimeya aluwaluwada yana iwakana faina, aku Iya au kaliva-mowa e ada vovoku yana nuwanuwa gitoyogina-mowa nuwainagekuya, e ada vaita koyona giveimeye-tagotagoku.

¹⁵ Iya yaku dewa vuvuna ani keke nuwaku gidamali faidiya. Faina dewa

[†] 7:12 Sam 19:8-9, 1Tim 1:8

iwakana nuwanuwaku gada faisewana ani keke gada faisewa, aku dewa keke iwakana ani gafafaisewana. Ada dewa koyodi ani ebaagouga wagaikuya ada nuwanuwaku gana velovelovogedi, aku au gafafaisewadi.[†]

¹⁶ Kai gavadewa gagugaiyedi ani keke nuwanuwaku gana gugaiye faina gaalamanena wada koyona, ada nuwainagekuya galutovonina vitana yaku dewa-dina koyona faidiya, aga taidei wagaine gaalamanena vaita Yaubada yana veimeya ani tunutunugina e ada gaawaveiwakanena.

¹⁷ E ada Iya keke nuwanuwaku ganadewa koyona, aku kai gana faisewana, aga kana alamanena ani Iya keke kaliva-moeku gada koyokoyona, aku velemonoena ani nuwanuwana-i koyona nuwainagekuya, e banae gimiyamiya ke gakoyona.

¹⁸ Gaalamanena Iya kaliva-mowa ani wagaikuya keke tamo nuwanuwa iwakana gida miyami. Faina gasefaga vaita gada gugai iwakana, aku keke akufaiweya.

¹⁹ Tova-nai nuwanuwaku gana gugai iwakana ani keke gada gugai. Ada tova-nai gana galuvaluva ada keke gana gugai koyona, e ani au dewa koyona gagugaiyena.

²⁰ Aku dewa koyona Iya keke nuwanuwaku ani kai gana faisewana, aga ina Iya tauku keke gada faisewa e aku nuwanuwana-i koyona gimiyamiya wagaikuya ani banae gifaifaisewana.

²¹ E ada gaitanuwigana vaita taidei anafai-

[†] 7:15 Gal 5:17

weya giyegeyegemona. Tova-nai nuwanuwaku gavana iwakana gada gugaiyena ani nuwanuwa koyona bademowa gimiyamiya wagaikuya.

²² Ada nuwainagekuya Yaubada yana veimeya gavemwamwalayena lakaina,

²³ aku gaitanuwigana nuwanuwa tulina givenibaineku ke vovoku gana vegugaiyena ke ganadewa koyona. Ada tainei nuwanuwana-koyona gitaitaiku toyogina, e ada gavana ganuwanuwayena gada faisewana ani giseku nuwanuwa koyona yana veimeya dibune, ada keke akufaiweya Yaubada yana veimeya gana matawalewaleye.†

²⁴ Oiyoi, kokoyoku Iya nuwakalikaliku! Gaito gida kibababaleku nuwanuwa-nai koyona wagaine e ada keke gada nauna alika anawai wagaine?

²⁵ Aku siule lakaina, Yaubada! Faina yaku laufata ganuwagana Yeisu Keliso wagaine-deya.†

E ada waitana, Iya tauku yaku nuwanuwa wagaine yaku nunu gasena ani Yaubada yana veimeya wagaine gana vetogugai, e aku nuwainageku ani vovoku yana luvadiga wagaine gaawaageku ke gavetogugai koyona wagaine.

8

Koyona anaveimeya wagaideya ani kana segena Aluwaluwa Tabuna yana toyogineya.

¹ Taidei faina tova malinai ide gavega kaveseyana Keliso nodi ani Yaubada keke gina awavekoyoyeda vaita ide wa yada koyona

† 7:23 Gal 5:17, Iyem 4:1 † 7:25 1Kol 15:57

e ada gida matavulogeda. Keke tamo awavekoyo faideya, keke-mowa.

² Gavaiyamu-yo ide keke wa adaveimeya adamatavuloga faina? Ide yada Kauveya Yeisu Keliso nodi kaveseyana faina, Aluwaluwa Tabuna yawai evaguna wagaine ginagoyeda ke yawai-nai wagaine kamiya. Keke aimo yogoyogodeyavo kada miyami koyona ada alika adiveimeya dibune, keke-mowa. Aku bademowa etoetoyavudeyavo.

³ Faina Yaubada yana veimeya Mosese givelena ani keke anafata gina lemeda ayo yada koyona kana ilova. Ide taudeyavo yada nuwanuwa ani nuwada givai-vagina ada keke adafaiweya veimeya-dina kana matawalewaleledi. E ada Yaubada Tauna faideya gigugaiyena. Tauna Natuna giimilina ke Banae givekaliva-mowa ide tokoyona anafaiweya aku Banae keke gida koyona, ada Yaubada ide yada koyona gilufata Natuna wagaine vaita Banae seyana tokoyona mamauwe. E ada ide matatabuda yada koyona adimatavuloga ani Banae giwaina.

⁴ Taidei anafaiweya Yaubada gidewa e ada ide adafaiweya yana veimeya kana matawalewaleledi ke yana veimeya ananuwanuwa tunutunugina gina seyegemonena ide wagaideya, ide kaliva-dana keke kada awaawaegeda taudeyavo yada nuwanuwa gagana wagaidiya aku aiyada Aluwaluwa Tabuna wagaine kaawaawaegeda.[†]

⁵ Badi gavega iawaegedi taudiyavo yadi nuwanuwa gagana wagaidiya ani nuwadi

[†] 8:4 Gal 5:16

gidola-vagaina yadi nuwanuwa-dina wagaidiya. Aku badi gavega iawaawaegedi Aluwaluwa Tabuna wagaine ani nuwadi isevelavelalaidi gavana Aluwaluwa Tabuna yana nuwanuwa anafaiweya.

⁶ Kai nuwada kanasena taudeyavo yada nuwanuwa gagana wagaidiya aga vona velemono ina alika kanuwanuwa, aku kai nuwada kanasena Yaubada Aluwaluwana wagaine, aga yawai evaguna anawai wagaine kana naunau ke wa yada nuwaniwalova kana miyamiya.[†]

⁷ Faina kai gavega nuwadi gina dolana taudiyavo yadi nuwanuwa gagana wagaidiya, aga badiyavo ani Yaubada ivenibainena. Taidei kaliva-dina Yaubada nibaidi, faina keke nuwanuwadi yana veimeya ina matawalewalevedi, ada vona velemono badi keke adifata ina matawalewalevedi.

⁸ E ada badi gavega nuwadi isena taudiyavo yadi nuwanuwa gagana wagaidiya ani keke-mowa adifaiweya Yaubada ina kivemwamwali.

⁹ Aku imiyavo ani kai Aluwaluwa Tabuna gimiyamiya wagaimiya, aga keke taumiyo yami nuwanuwa gagana wagaidiya wada awaegemi ke nuwami gidavai aku aiyada Yaubada Aluwaluwana nuwami givaina.[†] Aku kai badi gavega nuwainagediya Keliso Aluwaluwana keke gida miyami, aga badi keke Keliso yana kalivayavo.

¹⁰ Aku kai Keliso gimiyamiya wagaideya aga wayawaida velemono kamiyamiya. Koyona

[†] 8:6 Gal 6:8 [†] 8:9 1Kol 3:16

faina vovoda ina alika, aku Yaubada giseda yegayegadeyavo Banae matane faina, e ani aluwaluwada wayawaidi imiyamiya-vagata.

¹¹ Vona velemono vovomi ina alika. Aku Yaubada Yeisu Keliso gisiveyawana alikaya faina, kai Banae Aluwaluwana wagaimiya gimiyamiya, au Banae Yaubada-nai kadu imi vovomi gina siveyawadi Aluwaluwana yana toyogina wagaine, Banae bademowa gimiyamiya wagaimiya.[†]

¹² Tubuiyakuweyavo, Aluwaluwa Tabuna gimiyamiya wagaideya faina, gilubodada ke Banae yana nuwanuwa kana gugaiyena. Aku keke gida lubodada taudeyavo yada nuwanuwa gagana wagaidiya kana awaegeda.

¹³ Faina kai taumiyavo yami nuwanuwa gagana wagaidiya wana awaegemi ke wana gugaiyedi aga velemono wana alika, aku kai Aluwaluwa Tabuna yana toyogineya yami dewa koyona wana dibusoyogena e ani vaita wana luvealikadi, aga wayawaimi wana miyamiya.[†]

¹⁴ Faina ide Yaubada Aluwaluwana ginagoyeda ke yana nuwanuwa kagugaiyedi ani ideyavo Yaubada natunavo.

¹⁵ Nago-moena matavuloga faina Yaubada wamatausena, aku Aluwaluwa-nai Yaubada giveda ani keke gidagai ke kada vetogugai yogoyogoda kaduwe e ada adaToveimeya kada matamatause. Aku aiyada Banae yana miya aseaseda wagaidiya e ani Yaubada giawavenatuneda. Ada Aluwaluwa-nai ide

[†] 8:11 1Kol 3:16 [†] 8:13 Gal 6:8

seyana seyana adalutovona giveleda ke Tamada katagivedadagena, kavona, "Kamaku, Kamakuyo!" †

¹⁶ Ada Aluwaluwa Tabuna Tauna gikivemalina aluwaluwada wagaidiya ke givoneda ide Yaubada natunavo.†

¹⁷ Ada ide Yaubada natunavo faina, ide kaduwe adanuwakabubu miyamiyani-vagaina Yaubada gikidewedewedi ani kana nuwagadi. Ada keke ideyavo gaga aku Keliso nodi adanuwakabubudina kana nuwagadi.† Ada kai babi taide wagaine uloulolo kana nuwagadi Keliso anayegana faina, aga aimo muliya Keliso nodi wa adavemoimoina ke wa adadava Yaubada matane.

Aimoina Yaubada natunavo yawai iwaka-vagaina ina nuwagana.

¹⁸ Tova-nai ganuwanuwayena Yaubada yana iwakana mamalina aimo gina ivemogatalina wagaideya, uloulolo-dina kaulouloloyedi Keliso faine tova malinai ani vaita gaitoma-kavokavovo. Taide tuli-vagaidi e ada keke analauboda kana itaveluveyedi.†

¹⁹ Velemoena, Yaubada yana ibuibubuna moyaidi wa yadi nuwavetumagana iveitabodabodamowa tova-nai wagaine Banae natunavo gina ivemogatalidi.

²⁰ Tuwai-moena tova-nai Adama gikoyona ani ibuibubuna seyana seyana keke anafata gina miyamiya wa anaiwakana anafaiweya nagona Yaubada gibubudi. Taidei yana ibuibubuna-dina yadi miyami ani keke taudiyavo

† 8:15 2Tim 1:7, Gal 4:5-7 † 8:16 1Iyo 4:13 † 8:17 Gal 4:7, Ive 21:7 † 8:18 2Kol 4:17

yadi nuwenuweya aku Yaubada giveimeya anafaiweya,** faina gialamanena vaita aimoina gina kiveiwakanedi.

²¹ Ide Yaubada natunavo ani babi anavita vaita iyogoda, aku aimo Banae gina etoyavuda ke ide yavuyavudeyavo yada miya iwaka-vagaina kana miyamiyanina, ada kaduwe anafaiweya yana ibuibubuna gina etoyavudi ada gina kiveiwakanedi velemoena.†

²² Kaalamanena tuwai-moena ada gielai tova malinai ani ibuibubuna matatabuna nodi ivekovekolologa ke nodi iuloulolo, anafaiweya vavine gina vefaena yana venatuna faina ani anauloulolo au anafaiweya.

²³ Keke vaita badi yana ibuibubuna gaga ida vekolologa uloulolo wagaine, aku ide yana yoo kaduwe kavekovekolologa. Velemoena Yaubada giawaegena Aluwaluwana anafaiweya yana velekaovo nago-moena wagaideya, e aku aimoina kaveitabodaboda ke wa yada uloulolo kaluluyawai vaita vovoda gida etoyavuna koyona ke uloulolo-dina wagaidiya-deya. Ide kaduwe kaveitabodaboda wa yada nuwavetu-magana yadayada-nai faine, kavonaga, "Oiyoi! Gavatova-yo Yaubada gina vagauleda anaunuma wagaine e ada ide Banae natunavo wa vovoda evagudi kana miyamiya?" †

²⁴ Tova-nai adakibababala-nai taidei kanuwagana ada kanaunauwena, ide kavebutu kaveitabodaboda gaitoma-dina faidiya. Badi gavega

** **8:20** Tova-nai Yaubada babi gialatabutabuyena kaliva yadi koyona faina, alatabutabu-nai anavita giyegemona gaitoma matatabuna wagaidiya. (Eba 3:17-18) † **8:21** Ive 21:1 † **8:23** 2Kol 5:2-4

gavana iveitabodebodena aku bademowa inuwagana, ani aimo keke kaduwe ina veitabodaboda faine. Faina kai seyana kaliva bademowa gaitoma seyana givaina aga gavana faina aimo gina veitabodaboda faine?

²⁵ Aku kai gaitoma seyana kanuwavetumagana faine aku aimo keke gida yegemona, aga wa yada atuvefaila nodi kana bodabodana.

²⁶ Ada kaduwe anafaiweya, nuwadeya ide kakabekabebena aku Banae Aluwaluwa Tabuna gilemelemeda. Faina ide keke kada alamane gavaiyamu kada veoveola, aku Aluwaluwa Tabuna nuwainagedeya veola toyogina giawaveleveleda, ananogala vaita yawaina gitunetuneveyalugena, keke wa anavona.

²⁷ Yaubada gialamanena gavaiyamu aseasedeya kanuwanuwa.[†] Ada Aluwaluwanai yana veoveola ide Yaubada yana kaliva tabutabudeyavo faideya, ani Yaubada yana nuwanuwa mamauwe giveoveola. Ada taidei faina Yaubada gialamanena gavaiyamu Aluwaluwana yana nuwanuwa yana veoveoladina wagaidiya.

²⁸ Ada kaalamanena ide gavega Yaubada kanuwakabubuyena ani faideya gaitoma matatabuna wagaideya iyegemona ani Yaubada gifaifaisewa yada iwakana faina. Taidei anafaiweya gigugai faideya, ide yana yoo givenuwadadaneda yana nuwanuwa anafaiweya.

²⁹ Faina ide gavega tova tuwaina Yaubada gimadu alamane-vagaida vaita

[†] 8:27 Sam 139:1

Banae nodi kana veseyana ani kaduwe gimadu venuwadadane-vagaida ke kana uluva Banae Natuna anafaiweya. E ada Banae ani tomoïnagona, tainavo moyaidi nodi.

³⁰ E ada ide Yaubada gimadu venuwadadane-vagaida ani kaduwe gidouweda yana yoo wagaine. Ada ide gidouweda ani kaduwe giseda yegayegadeyavo e ada ide keke wa yada koyona Banae matane. Ada ide giseda yegayegadeyavo ani kaduwe adaivi ani vemoimoina ivina giveleda.[†]

Yaubada yana nuwakabubu wagaideya ani keke tamo gavagaitoma anafata gina seboda.

³¹ E ada gavaiyamu kana nuwanuwa? Yaubada gimwala ide faideya faina, gavaiyamu, anafata tamo gaito givenibaineda ani gina toyogisegeda? Keke, keke-mowa.

³² Yaubada Tauna Natuna keke gida nuwalolone aku moyaida faideya giawaegena. Ada anafaiweya Natuna giveleda, kaduwe au wa yana nuwadoga gavaleme adalauboda ani gina veleda.

³³ Gavaiyamu, ide Yaubada yana kalivayavo venuvenuwadadanideyavo ani gaito anafata gina awavekoyoyeda vaita kakoyona? Keke tamo gaito! Yaubada Tauna yada koyona givenuwaegedi ke giseda yegayegadeyavo Banae matane.

³⁴ Ada gaito anafata gina itavenuwadadaneda vaita adalauboda matavuloga kada nuwaga yada koyona faina? Keke tamo gaito! Faina Yeisu Keliso yana alika wagaine yada koyona analaufata giwaina. E, kaduwe giyawa-vagila ada Yaubada

[†] 8:30 2Tes 2:13

aiyatagine wa yana veimeya gimiyamiya aku giveoveola faideya.†

³⁵ Keliso yana nuwakabubu wagaideya ani lakai-vagaina, keke ginaavai. E ada gavana gina yegemona ayo gina ludakada nuwakabubunai wagaine-deya? Keke, keke tamo. Kai vita tulina tulina inaelai wagaideya, kai kana aseuloulolo o kai mali kaliva ina gugai koyona wagaideya Keliso kavetumaganena faina, o kai mafa gilavuda loka faina, o kai nuya keke, o kai ebagilagi lilivane kamiya, o kai kaliva nuwanuwadi ina luvealikada faina, taidei vita-dina ani keke adifaiweya ina ludakada Keliso yana nuwakabubu wagaine.

³⁶ Taidei vita-dina faidiya tova tuwaina wagaine Buki Tabu wagaine ivetokilumina givonga,

“Yaubada, imeyavo ya kalivayavo faina,
yadayada seyana seyana kaliva
nuwanuwadi ina luvealikama.
Anafaiweya sifi ikiabidi ke ina luvealikadi,
badi inuwanuwa au ina luvealikama.” †

³⁷ Aku au kai taidei vita-dina ina yegemona wagaideya, Keliso ide ginuwakabubuyeda ani Banae gilemelemeda e ada vita matatabuna wagaidiya kana vetoyogi-moena ke kana toyogisege-vagaidi.†

³⁸⁻³⁹ Iya gaalamanena velemono ani keke tamo gavana anafata gina ludakada Yaubada yana nuwakabubu wagaine-deya. Kai kana alika o kai wayawaida kana miyamiya, kai aneloseyavo o kai

† 8:34 1Iyo 2:1, Ibel 7:25 † 8:36 Sam 44:22 † 8:37 1Iyo 5:5

aluwaluwa bwanebwanebwanenedi badi toveimeya, keke-mowa badi faidiya Yaubada yana nuwak-abubu faideya ginasege. Kai gavana gina yegemo malinai o kai aimo tova gielaelai, kai totoyogina mwatuguya o kai babi dibune-mwane, o kai ibuibubuna gavana moyaidi wagaidiya, e ani keke tamo gavana anafata gina ludakada Yaubada yana nuwakabubu gielai yada Kauveya Yeisu Keliso wagaine-deya. Au keke ada keke-bamowa.

9

Paulo nuwana givita lakaina faina meIsileli ani keke Keliso wagaine ida vetumagana.

¹ Iya Keliso yana kaliva, e ada keke gada vefwayafwaya aku gavana gana ifufuyena ani vona velemoena. Kaduwe nuwafoukuya galutovonina Aluwaluwa Tabuna yaku nuwanuwa giawavelemoenayedi.

² E ada gaitoma seyana faina gana ifufu waga-miya, taidei gaitoma-nai ani ebanuwavita lakai-vagina wagaikuya. Vona velemoena tova moyaina nuwaku givitavita ke aseaseku giuloulolo lakaina yaku yoo meIsileli faidiya.

³ Faina biyavo-dina ani tauku yaku yoo aku taudiyavo keke ida awaegedi Keliso wagaine. Ada kai anafata gida lemedi aga badi adimatavuloga Yaubada wagaine-deya ani Iya gada waina ada Keliso Tauna gida ludakana wagaikuya-deya e ada badi Keliso nodi ida veseyana.

⁴ Badiyavo ani meIsileli. Tuwai-moena Yaubada givenuwadadanedi ke givonedi, givona, “Imiyavo ani natukuweyavo.” Ada nagona

Bana gimiyamiya adimwatuguya ada Tauna yana iwakana mamalina giivevemogatalina wagaidiya. Ada biyavo-dina wagaidiya Yaubada veyavo anawai gibubudi. Ada badi wagaidiya Yaubada yana veimeya givedi Oya Sainai wagaine. Ada badi Yaubada givewaledi gavaiyamu ina oduodu Tauna wagaine, ada gaitoma moyaina faidiya givonadabadabayedi.

⁵ Badi tamadiyavo nagona Ebelaamo, Aisake ke Iyakobo ani wagaidiya itubuyegemona. Ada badi yadi tubudelideli wagaidiya-deya Yaubada yana venuwadadana Keliso ani giobelai babiya ke givekaliva-mowa,[†] Banae ani Yaubada,[†] gaitoma matatabuna adi Toveimeya. Tainei faina ide analauboda-mowa kana dava-vagina. Ika, anafaiweya.

⁶ Yaubada givonadabadaba Ebelaamo, Aisake ada Iyakobo wagaidiya vaita yadi tubudelideliyavo ani yana awanuwakabubu ina vetoinavuvunena. Aku meIsileli tufodi keke ida awaegedi Keliso wagaine faina, gavaiyamu Yaubada yana vonadabadaba-nai? Velemoena giyegemona kai keke? Ika, au giyegemona. Faina biyavo-dina itubudelideli kaliva-nai anayegana Isileli wagaine ani Yaubada matane keke matatabudi meIsileli velemoena.**

⁷ Kaduwe anafaiweya Ebelaamo yana tubudelideli ani keke matatabu-moedi Ebelaamo natunavo velemoena, faina tova tuwaina wagaine Yaubada keke gidavona Ebelaamo wagaine vaita matatabu-moedi ani yana

[†] 9:5 Mad 1:1-2 [†] 9:5 Iyo 1:1 ** 9:6 Kaliva-nai anayegana Isileli ani anayegana nagona Iyakobo. (Eba 32:24-28)

tubudelideli, aku bana Aisake gagana faine givona, “Natu Aisake wagaine ya tubudelideli ayegana ina waiwaina.” †

⁸ Taidei vona-nai anaalamana ani Ebelaamo yana tubudelideli vovone iyegemona e ani keke vaita matatabu-moedi Yaubada natunavo. Aku aiyada Ebelaamo natuna Aisake ada yana tubudelideli, badiyavo Yaubada yana vonadabadaba guwana wagaine iyegemona ani biyavodina Yaubada ginuwenuwedi vaita Banae natunavo.

⁹ Faina yana vonadabadaba-nai Ebelaamo wagaine ani taidei anafaiweya givona, “Malamala gielaelai anatova anafaiweya malinai, kaduwe ganayewa-vagileku ada Sela bademowa natuna kaliva gina venatunena.” † Yaubada givona tayuwe anafaiweya faina, ide kaalamanena ani Ebelaamo yana tubudelideli badi iyegemona taidei vonadabadaba-nai wagaine.

¹⁰ Ada keke taidei gagana aku kaduwe tova-nai meIsileli tamadiyavo nagona seyana anayegana Aisake ani Libeka nodi inagi ada Libeka iveifuga ani kamodiya natuyuweyuwe.

¹¹⁻¹² Ada biyabiyama-dina aimo keke ida tubuga ada aimo keke tamo gavana iwakana o kai koyona ida faisewa, aku Yaubada yana venuwadadana giseyegemonena ke Libeka givonediga, “Tomoïnagona gina vetogugai kwamaneya wagaine.” † E ada Yaubada yana nuwanuwa kaliva adivenuwadadana faina giseyegemonena, ina keke vaita yana venuwadadana gavaiyamu kaliva inadewa

† 9:7 Eba 21:12, Ibel 11:18 † 9:9 Eba 18:10,14 † 9:11-12 Iyeg 25:23

faina, aku yana vuvu velemono ani Tauna yana nuwanuwa.

¹³ Anafaiweya ivetokilumina Buki Tabu wagaine, givona, “Iyakobo ani banae ganuwak-abubuyena, aku Iso keke.” †

¹⁴ Yaubada kaliva seyana givenuwadadanena aku keke anavelu faina, kai tamo gaito gidavona, “Gavaiyamu kadavona, vaita Yaubada yana dewa-nai wagaine kaliva givenuwadadanedi ani keke tunutunugina?”

Ada Iya gada lufata, gadavona, “Keke. Keke-bamowa.

¹⁵ Yana venuwadadana ananuwanuwa faina, tuwai-moena Yaubada Mosese wagaine givon-ayena, givona,

‘Kai nuwanuwaku seyana gaito
gana nuwakalikaliyena,
aga au gana nuwakalikaliyena.
Kai nuwanuwaku seyana gaito
gana nuwakabubu,
aga gana nuwakabubuyena.’ ” †

¹⁶ E ada Yaubada yana venuwadadana vuvuna ani keke badi gavega nuwanuwadi faina o kai ida vedivediwe e ada Yaubada gida venuwadadanedi, keke. Aku aiyada Banae Tauna yana nuwakalikali wagaine kaliva givenuvenuwadadanedi.

¹⁷ Anafaiweya Yaubada awana Mosese givon-ayena Itipita anakini wagaine, givona,

† 9:13 Mal 1:2-3 † 9:15 Iyeg 33:19

“Iya gakilakaini ke uvekini e ada taidei wagaine
yaku toyogina gana seyegemonena, ada kaduwe akuyegana
kaliva ina alamanena babi matatabuna wagaine.
Taidei vuvuna-nai faine Iya gavenuwadadadeni.” †

¹⁸ Yaubada givona tayuwe anafaiweya faina, ide kaalamanena vaita kai nuwanuwana kaliva seyana gina nuwakalikaliyena, aga au gina nuwakalikaliyena, aku kai nuwanuwana bana gaito aseasena gina kivekugana, aga au gina kivekugana.

¹⁹ Taidei faina kai tamo gaito ginavona, “Gavana Yaubada nuwanuwana gina gugai ani keke seyana gaito anafata gina seabodabodana. Ada kaduwe, Yaubada ani Banae-nai kaliva tufodi aseasedi gikivekugadi. E ada kai kaliva ina dewadewa koyona aga keke gida luboda Yaubada ginavona venuvenuwadadadeni. Keke-mowa.”

²⁰ Aku oye vaita gaito ayo Yaubada wagaine uvonavonaveyewa? O kaliva-mowa ani keke-mowa alauba Yaubada unavona venuvenuwadadane vaita gigugai koyona. Gavaiyamu, analauboda wela gina vonaveyewa anatoibubuna wagaine ginavona, “Gavana vuvuna-yo taidei anafaiweya ububuku?” †

²¹ Wela anatoibubuna wa yana veimeya babinai giibuibubunena wagaine. Taidei babi-

† 9:17 Iyeg 9:16 † 9:20 Ais 29:16, 45:9

nai bademowa gikidewedewena ani tufona wagaine wela yayawana gina bubuna ada awafaina gina kilumina, tainei wela-nai kanibutu gaga wagaine ina vefaisewana. Kaduwe babi-nai tufona gina bubuna, wada au ebakani.†

²² Ada Yaubada anafaiweya wela anatoibubuna. Banae kaliva gibubuda. Aku kaliva tufodi tova moyaina idewadewa koyona, e ada Yaubada ginuwanuwanage vaita yana nuwakoyo ke yana toyogina badi yadi dewa koyona faina gina seyegemonedi. Aku badi adimatavuloga faina inaunau agolaufofola anawai wagaine ani keke gidamadu vematavulogidi aku au giatuvefailemoedi.

²³ Badi giatuvefailemoedi, faina ginuwanuwa kaliva-dina givenuwadadanedi faidiya ke yana nuwakalikali ina nuwagana. Badiyavo ani Bana nuwanuwana yana dewa tulina tulina matatabuna iwaka-vagaidi gina ivemogatalidi wagaidiya, biyavo-dina gikidewedewe-vagaidi ke Banae nodi ina miyamiya yana iwakana mamalina wagaine.

²⁴ Wada gavega? Ide taudeyavo Yaubada givenuwadadaneda, keke meIsileli gagana wagaidiya-deya aku kaduwe badi keke meIsileli wagaidiya-deya.

²⁵ Anafaiweya Buki Tabu wagaine falofita Osey Yaubada yana vona imi keke meIsileli faimiya givetokilumina, givona,

“Badi kaliva-dina nagona keke

† 9:21 Iyel 18:5-11, 2Tim 2:20-21

yaku kalivayavo ani faidiya ganavona,
 'Badi Iya yaku kalivayavo.'
 Ada anafaiweya yoo-dina nagona keke
 gada nuwakabubuyedi, ani gana vonedi
 ganavona,
 'Ganuwakabubuyemi.' " †
 26 "Ada tayuwe fafali-nai wagaine nago-
 moena Yaubada
 givonedi, givona, 'Imi keke Iya yaku kali-
 vayavo' ani
 wadedeku gina vonedi ginavona, 'Imiyavo
 ani Iya
 Yaubada miyamiyani-vagaiku
 natukuweyavo.' " †

27 Ada kaduwe tova tuwaina falofita Aiseya bo-
 nana lakaina wagaine giawamogatala meIsileli
 faidiya, givonavona,

"MeIsileli adiyoo moyai-moedi taliya ana-
 makama anafaiweya
 nonogana tufodi gagana adikibababala
 ina nuwagana.

28 E ada keke moyaidi inatufu yadi fafali
 wagaine, faina
 biyavo-dina KAUVEYA gina-
 madu vevonayavugidi ke
 adimatavuloga ina madunuwaga-moena." †

29 Taidei faine tuwai-moena falofita Aiseya
 givonaye-vagaina, givona,

† 9:25 Ose 2:23 † 9:26 Ose 1:10 † 9:28 Ais 10:22-23

“Kai KAUYEYA Totoyogi-vagaina ani keke
nuwakalikaliya gida awaega ke yama
tubudelideli
tufodi idamiya wayawaidiyavo, aga ime
anafaiweya
meSodoma ke meGomola, Yaubada
giluyavuledi.” **

MeIsileli keke nuwanuwadi ina vetumagana Keliso wagaine.

³⁰ Ida vona-dina gaifufuyedi ani adialamana taidei anafaiweya. Badi keke meIsileli ani keke ida vediwe yadi yegayegana ina nuwagana Yaubada matane faine,** aku malinai Keliso ivetumaganena faina, Yaubada gisedi yegayegadiyavo Bana matane. E, badi keke meIsileli keke ida vediwe,

³¹ aku meIsileli ani inuwanuwa vaita Yaubada yana veimeya Mosese givelena ani ida matawalewaleyedi ada wagaidiya-deya Yaubada gidasedi yegayegadiyavo Bana matane, e ada ivediwe toyogina aku ivediwe-wayoga.

³² Gavaiyamu-yo yadi yegayegana faina ivediwe-wayoga? Faina keke wa yadi vetumagana taudiyavo ida awaegedi Yaubada wagaine aku taudiyavo yadi dewa iwakadi wagaidiya itunutunuvala. E ada badi inaunau

** 9:29 Aiseya yana vona givewaleda vaita kai Yaubada badi meIsileli keke wa yana nuwakalikali gidadewa iwakana wagaidiya aga keke tamo gaito anakibababala gida nuwaga. (Ais 1:9) ** 9:30 MeIsileli igaluvaluva evona taudiyavo yadi gu-gai iwakana wagaidiya Yaubada gidasedi yegayegadiyavo Banae matane, aku keke.

anafaiweya aku vaita agedi itutuna kabala wagaine ada ibeu.**

³³ Anafaiweya Buki Tabu wagaine ivetokiluma ani Yaubada Keliso faine givona,

“Waitana, yaku melala Saiyoni wagaine
seyana gaito gasesena,
Banae ani vaita kabala anafaiweya,
ada kabala-nai wagaine
kaliva agedi ina tutudi inabeu.
Aku badi gavega Banae wagaine
ina vetumagana ani keke seyana wa yana
vovomumu
gina miyamiya yana vetumagana
gisebamuina faina.” †

10

¹ Imi tubuiyakuweyavo Loma wagaine, ganuwanuwa lakai-vagina yaku yoo meIsileli adikibababala ina nuwagana Yaubada wagaine-deya. Tainei faina tova moyaina gaveoveola faidiya.

² Iya gaalamanena ada akufaiweya gana awatalatalaina vaita meIsileli-dina idibudibumwaiga velemono Yaubada faine, aku gavana Yaubada nuwanuwana ani keke nuwadi

** 9:32 Badi meIsileli-dina inuwanuwa vaita Banae Venu-venuwadadanina meIsileli adiTokibababala gida yegemona wa-gaidiya wai tulina wagaine, aku keke. E ada keke ida vetumagana vaita Banae-nai ani adiTokibababala-moena. Ada anafaiweya kaliva ginaunau aku agena gitutuna kabala wagaine ada gibeu, anafaiweya meIsileli ibeu Yeisu wagaine. † 9:33 Ais 8:14, 28:16

gidamali. E ada au taudiyavo yadi nuwanuwa wagaine idibumwaiga-kavokavovo.

³ Faina Yaubada yana wai wagaine kaliva gisesedi yegayegadiyavo matane ani ibavuyena, e aku nuwanuwadi evona vaita taudiyavo yadi yegayegana ina vaina taudiyavo yadi dewa iwakana ke yadi gugai wagaidiya. Taidei faina Yaubada yana yegayegana anawai keke taudiyavo ida awaegedi wagaine.†

⁴ Aku Keliso gielai ada Mosese yana veimeya ananunu giyegemona velemono Banae wagaine, e ada veimeya-nai giveiveimeya anatutuya ani giavaina. E ada malinai badi gavega wa yadi vetumagana taudiyavo ina awaegedi Keliso wagaine, ani seyana seyana Yaubada gina awaveiwakanedi ke ginasedi yegayegadiyavo Banae matane.

*Kaliva matatabuna adifaiweya kibababala
ina nuwagana.*

⁵ Faina kaliva yada yegayegana Mosese yana veimeya anawai anamuliya wagaine ani tova tuwaina Mosese givetokiluma faine, ada ananuwanuwa taide anafaiweya. “Kai gaito nuwanuwana yawai gina nuwagana veimeya anamuliya wagaine, aga veimeya matatabu-moena gida matawalewaleyena.” †

⁶ E aku yada yegayegana Keliso anavetumagana anawai wagaine ani ananuwanuwa taide anafaiweya. “Keke nuwainagemiya wanavona,

† 10:3 Lom 9:30-32 † 10:5 Vei 18:5, Gal 3:12

‘Gaito ginalaka gabameya’ ” † e ada Keliso gina obualiye?

7 “Ada kaduwe keke wanavona, ‘Gaito ginaobu olu keke wa anaebalauyabu wagaine, wada toalika aluwaluwadi yadi fafali’ ” † e ada Keliso gina lakaaliye? Keke taidei anafaiweya wanavona, faina Keliso bademowa alikeya giyawa-vagila.

8 Aku kadu vona seyana Buki Tabu wagaine givona, “Yaubada yana vona ani keke atuwada wagaideya ada vaita kana galuvaluva kanalele faine. Ida bana bademowa gimiyamiya wagaideya, awadeya ke yada nuwenuweya.” Tainei vetumagana anavona-nai ani alulumamalena.†

9 Ina vetumagana anavona-nai ani taidei anafaiweya. Kai una awamogatala kaliva matadiya, una vonaga, “Yeisu Banae Kauveya ada akuToveimeya,” ada nuwainageniya una vetumagana vaita Yaubada gisiveyawana alikeya, aga Yaubada gina kibababaleni ya koyona wagaidiya-deya.

10 Faina wa aseaseda kavetumagana ayo giseda yegayegadeyavo Tauna matane, ada awadeya kaawamogatala Yeisu Banae Kauveya ani ada-Toveimeya e ada adakibababala kanuwagana.

11 Anafaiweya Buki Tabu wagaine Keliso faine givona,

“Badi gavega Banae wagaine ina vetumagana
ani keke seyana wa yana vovomumu
gina miyamiya yana vetumagana

† 10:6 2Vei 30:12 † 10:7 2Vei 30:13 † 10:8 2Vei 30:14

gisebamuina faina.” †

12 Vona taidei ananuwanuwa ani ide kaliva matatabuda faideya givona. Faina Yaubada matane meIsileli ada kadu badi keke meIsileli ani keke tamo adatulina gida miyami wagaideya, au moyaida adaita au seyana Banae matane. E ada vona-nai matatabuda faideya. Faina matatabuda ani yada Kauveya Yaubada anakai-be-mowa, ada badi gavega iveolena yana leme faina ani matatabudi Banae yana nuwadogeya gina gugai iwakana wagaidiya.

13 Faina “Badi gavega KAUYEYA ina veolena adik-ibababala faina, ani gina kibababaledi.” †

14-15 Aku meIsileli badi Yeisu idibusoyogena ani kai tamo gaito gidavona faidiya, gidavona, “Kai Yaubada keke valeya anatolaumamala gida imilidi idana, aga gavaiyamu valeyana ida awatalatalaina? Keke meyameyaganina. Ada kai keke tamo gaito gidaela valeya iwakana gida ifufuye wagaidiya, aga keke adifaiweya ina nogali. Ada kai keke yada Kauveya valeyana ida nogali, aga kadu keke adifaiweya ina vetumagana wagaine. Ada kai keke ida vetumagana, aga keke adifaiweya ina veole adikibababala faina.”

Aku Iya gada lufata, gadavona, “Aku bade-mowa Yaubada tomatawa giimilidi ielai ada badi meIsileli ani Yaubada yana valeya iwakana iveleveledi, anafaiweya Buki Tabu wagaine Aiseya givona,

† 10:11 Ais 28:16 † 10:13 Iyol 2:32, Gug 2:21

‘Badi Valeya Iwakana iawaawamogatalena
ani yadi ela gava veiwaka!’ ” †

¹⁶ Aku keke badi meIsileli matatabudi valeya iwakana ida matawalewaleye. Taide yadi dibusoyoga-nai faine ani falofita Aiseya yana buki wagaine givetokilumina givona, “KAUVEYA, ime ya valeya iwakana aawaawamogatalena aku gaito givetumagane? Keke tamo.” †

¹⁷ E ada kaliva ivetuvetumagana Keliso wagaine vuvuna ani inoganogala, tainei Keliso yana vona inoganogalina.

¹⁸ Kai taidei anafaiweya, aga meIsileli faidiya ani gavaiyamu kanavona? Badi aimo keke valeya iwakana ida nogali? Ika, bademowa inogalina. Anafaiweya Buki Tabu tuwaina wagaine givona,

“Badi gavega ivevewala Yaubada faina ani
adimatawa
gimutula ginau fafali matatabuna
wagaidiya.” †

¹⁹ Kaduwe kai tamo gaito gida toolidadana, gidadavona, “Valeya-nai ani meIsileli ialamanena o kai keke?”

Ada Iya gada lufata, gadavona,** “Nagona Mosese givetokilumina Yaubada yana vona meIsileli faidiya, givona,

† 10:14-15 Ais 52:7 † 10:16 Ais 53:1 † 10:18 Sam 19:4

** 10:19 Ika, meIsileli valeya-nai inogalina ke ialamanena, aku keke nuwanuwadi ina vetumagana faina, Yaubada Tauna valeya giivemogatalina badi keke meIsileli wagaidiya. Nuwanuwana meIsileli ginagadi ina veumagigi, e ada kai ina nuwawilana aga ina vetumaganena.

‘Imi meIsileli yami nuwanuwa wagaidiya
wavonavona,
“Badi keke meIsileli ani kaliva-kavokavovo,
vaita kwavakwavadiyavo.”
Aku Iyayeku ani badiyavo faidiya ganavona,
“Badiyavo ani yaku yoo,”
e ada matamiya badi faidiya gana gugai
iwakana
e ada adiiwakana wana luvadigena ke
wana nuwakoyo.’” †

20 Aku Aiseya wa yana asevatu Yaubada yana
vona giawamogatalena meIsileli wagaidiya
givona,

“Badi keke meIsileli, biyavo-dina keke
ida leleleku ani ilunuwagaku.
Badi kaliva-dina keke ida nuwanuwa wa-
gaikuya ani wagaidiya gaivemogataliku.” †

21 Aku meIsileli faidiya Yaubada givona,

“Mala gilavuna ke ginau-deya mala gibogi
ada nimaku gatunena
evona vaita inayewa wagaikuya ke
gana sivaivaidi,
aku badi keke yaku vona ida matawalewaleye
aku awalakalaka taudiyavo.” †

11

MeIsileli aditufo Yaubada ginuwakalikaliyedi.

¹ E ada kai tamo gaito gida toolidadana, gidavona, “Gavaiyamu-yo meIsileli ani Yaubada Tauna yana kalivayavo nonogana gidibusoyogedi?”

Ada Iya gada lufata, gadavona, “Au, keke-mowa!” Iya gaalamanena Banae nuwanuwana yana kalivayavo, ada keke gida dibusoyogedi. Faina Iya kaduwe kwana Isileli seyana, Iya seyana Ebelaamo yana tubudelideli, ada gayege-mona gaisena Beniyamina anaunuma wagainede-[†] deya. E ada waitana, Iya keke Yaubada gida dibusoyogeku.

² Ada keke yana kalivayavo meIsileli gida vedomobubuse-vagaidi, badiyavo tova tuwaina givenuwadadane-vagaidi. Wana nuwaududuna gavana Buki Tabu wagaine ivetokilumina Ilaitiya faine. Banae MeIsileli yadi dewa koyo-moedi faidiya giawalavedi Yaubada wagaine, givona,

³ “KAUVEYA, ya falofitayavo moyaidi iluvealikadi, ada aebavebolavoi iluyawelidi. Akukaibe-mowa gavetumaganeni ani gamiyamiya wayawaiku, aku ileleleku ke ina luvealikaku.” [†]

⁴ Ada gavaiyamu Yaubada yana laufata? Givona, “Keke akaibe-mowa, aku yaku kalivayavo adiyoo seveni tausani (7,000) gaseliyedi imiyamiya Tauku faikuya. Badi keke tugadi ida vetodonedo ke ida oduodu yaubada

[†] 11:1 Fip 3:5 [†] 11:3 1Kin 19:10,14

fwayafwaya ivewagana Beli** wagaine.” †

⁵ E ada anafaiweya kaduwe tova malinai, badi meIsileli wagaidiya yoo seyana kabisona badi tovetumagana ani aimo gimiyamiya. Badi keke wayadi iwakana e ada Yaubada gida venuwadadanedi aku au yana nuwadogeya givenuwadadanedi ke Banae yana kalivayavo.

⁶ Yaubada kaliva givevenuwadadanedi ani keke yadi dewa iwakana faina, aku aiyada yana nuwadoga wagaine givevenuwadadanedi. Kai yadi dewa gida itaitana ke yadi dewa iwakana faina gida venuwadadanedi, aga taidei yana nuwadoga-nai ani vaita yadi gugai iwakana fatana, e ada wada keke nuwadoga velemona.

⁷ E ada Yaubada meIsileli tufodi gaga givenuwadadanedi ani gavaiyamu kana nuwenuwena? MeIsileli ivediwe evona ina yegayegana Yaubada matane, aku ivediwe-wayoga. Au tufodi gagana Yaubada givenuwadadanedi ani kaliva-dina inuwagana, aku meIsileli velugadiyavo ani idibusoyoga e ada Yaubada yadi asekuga gikivetubugi-moena.

⁸ Taidei yadi asekuga-nai faina ivetokilumina Buki Tabu wagaine, givona,

** **11:4** Ilaitiya yana tova wagaine, kaliva wa yadi nuwanuwa balana ivetumagana vaita yaubada fwayafwaya anayegana Beli ani giveimeyedi kauwana ke wei ada gaitoma matatabuna babi wagaine yadi veguwa ada kevakeva matatabuna yadi tubuga faine. Ada tova-nai meIsileli Yaubada ina vedomobubusena, tova ke tova Beli anakilumina wagaine ina oduodu. Tayuwe tova-nai wagaine meIsileli aditoveimeya anayegana Eabi, ada vavinena Desibeli nodi meIsileli inuvuyoyedi ke ina oduodu kilumina-nai wagaine, bana Desibeli giwai gialiyena yana fafali wagaine-deya. (1Kin 16:29-33). † **11:4** 1Kin 19:18

“Yaubada nuwadi gikivetufadi e ada keke adifaiweya
nuwadi ginamali ke ina venuwadadana tunutunugina.

E ada tova tuwaina analaba malinai ani badi wa matadi iitaita aku keke ida itaitainana, ada wa tagadi vona inoganogala aku vona-dina adinuwanuwa faina ani keke gida mamali wagaidiya.” †

⁹ Ada kaduwe anafaiweya Deivida givona tova-nai Yaubada giveolena ke nibainavo nuwadi gina kivetufadi, givona,

“Yadi kanibutu wagaidiya ivemwamwala yadi aa lakai-vagaina faina, aku tova-nai wagaine nuwanuwaku nibaidiyavo ida vedaidi ke idabeu.

Wada adimatavuloga Yaubada gida veledi.

¹⁰ Kaduwe nuwanuwaku matadi ida kiveowadi e ada keke adifaiweya idaita-dewadewa, ada adivita moyaina wagaidiya domodi gida siveibouli-vagaidi.” †

Taidei anafaiweya Deivida yana vona.

Badi keke meIsileli ani kibababala inuwagana.

¹¹ Kaduwe kai gaito tamo gida toolidadana, gidavona, “Aku badi meIsileli ani keke ida vetumagana Keliso wagaine faina, wada ikoyona, ada taudiyavo iludakadi Yaubada

† **11:8** 2Vei 29:4, Ais 29:10 † **11:10** Sam 69:22-23

wagaine-deya. Aku velemono ana iludaka-vagaidi?"

Iya gada lufata gadavona, "Au keke-mowa! Badi yadi ludaka Yaubada wagaine-deya ani keke ludaka-vagata. Aku ikoyona faina, Yaubada badi keke meIsileli faidiya ginuwanuwa ke gina kibababaledi, e ada meIsileli ina itana adikibababala ke ina luvadigena. Ada yadi luvadiga faine ina nuwawilana ke ina vetumagana Yeisu wagaine.

¹² Ada meIsileli ikoyona ke Yeisu Keliso idibusoyogena faina, badi keke meIsileli moyaidi babi wagaine ani Yaubada wana giyavuna faidiya e ada ina vetumagana Keliso wagaine ke Banae wayana nuwadoga gina lemelemedi lakaina, e ada yadi vemwamwala gina tubugamowa. Badi meIsileli ani keke nuwanuwadi, e ada Yaubada givelena badi keke meIsileli. Aku aimo kai meIsileli ina nuwawilana ke Yeisu ina vetumaganena, aga guwana ani moyaida kana vemwamwala lakai-vagina Yaubada wagaine ke kana gakaikai yana nuwakabubu lakai-moena faina."

¹³ Aku imi gavega wamiyamiya Loma wagaine ani tufomi keke meIsileli, ada tova taidei ganavona wagaimiya. Yaubada givenuwadadaneku ke gaveafositolo imi keke meIsileli wagaimiya, ada taidei faina yaku gugainai gakikilakaina

¹⁴ e ada kai tamo wai wagaine badi yaku yoo meIsileli imi amikibababalanai wanuwagana ani badi ina luvadigena. Nuwanuwaku gana ivenuwanuwadi ke badi

kaduwe ina nuwagana, ada taide wagaine meyameyaganina tufodi gana kibababaledi.

¹⁵ Wana nuwanuwayena. MeIsileli moyaimoedi keke ida vetumagana Yeisu wagaine faina, Yaubada givedomobubusedi, e ada vilena ani babi matatabuna anatomiyayavo badi keke meIsileli ani moyaidi Yaubada nodi iveseyana. Kai meIsileli yadi dibusoyoga taidei anafaiweya, aga gavaiyamu kai meIsileli moyaidi ina nuwawilana ada ina vetumagana Yeisu wagaine? Tainei ani ebavemwamwala lakai-moena, au velemoena ani anafaiweya seyana gaito unuwakabubuyena gida alika aku gidayawa-vagila alikeya.

¹⁶ Ebaita seyana ani taidei anafaiweya. Kai wana bavagu ke guwa nagona Yaubada wana vena, aga vaita anafaiweya bademowa yami aa matatabu-moena seseliyena Yaubada wagaine. Anafaiweya kai ai olive walamina faina wanavona, "Taidei ai vuvuna ani Yaubada toinavuvuna," aga kaduwe lagana bademowa awaawaegedi Banae wagaine.**

¹⁷ Badi meIsileli ani vaita anafaiweya ai olive melamelala bakula wagaine, aku imi keke meIsileli ani anafaiweya ai olive walawala walaiya gitabotabo. Ada malinai vaita ai-nai

** **11:16** Tova tuwaina meIsileli tamadiyavo nagona iawaegedi Yaubada wagaine ani faidiya givona, "Badi yaku kalivayavo." E ada meIsileli malinai imiyamiya ani aimo badiyavo Yaubada yana kalivayavo. E ada taide vonalufefosau-nai wagaine, ai olive walamina ani meIsileli tamadi nagona aku lagana ani badi tubudelideli meIsileli Ebelaamo wagaine-deya.

olive melamelala wagaine Yaubada lagana tu-fona giludobo-yavuledi ke gisegedi, aku imi keke meIsileli givai giyogovefovefosemi ai melamelala wagaine. E ada imiyavo ai-nai lagana itufu nodi yami toyogina wavaivaina ai walamina wagaine ke watabotabo iwakana.

¹⁸ E aku keke gida luboda wana nuwalaka. Badi meIsileli-dina vaita ai lagana Yaubada giludobo-yavuledi ani imi keke wada kaiwabusegedi. Ai lagana keke walamina ida vekavekani aku walamina ani lagana ivekavekanidi. Imi ai walawala lagana au kikivefosemi wadedeku-deya ani meIsileli walamidi wagaine-deya yami toyogina wavaivaina, e ada keke-mowa gida lubodami ke taumiyavo wana davalakalakaimi.

¹⁹ Aku kai seyana gaito imi keke meIsileli amimwatuguya ginavona, "Vona velemonoena badi wagaidiya-deya ide katoyotoyogina, afamomoku meIsileli Yaubada giludobodi aku ide yada mwatugu gisiwaina."

²⁰ Tayuwe anafaiweya wavona ani wada velemonoena, e aku meIsileli keke Keliso ida vetumagane faina, Yaubada giludobodi. Aku imiyavo ani wavetumaganena Keliso, ada taidei vuvuna-nai wagaine wamidimididi iwakamiyavo Yaubada matane. E ada wana itaveyabimi. Keke wana nuwanuwalaka aku gilubodami wana matauta.

²¹ Faina meIsileli badi vaita Yaubada yana ai melamelala lagana velemoedi aku ikoyona faina, au giludobo-yavuledi. E ada imi anafaiweya ai walawala lagana giavimi ani

wana itaveyabimi. Kai yami vetumagana Keliso wagaine wana segena, aga imi kaduwe keke gina nuwakalikaliyemi aku gina ludobo-yavulemi.

²² Wana itana, Yaubada yana dewa ani nuwakalikali Tauna, aku kaduwe yana dewa seyana ani wa yana toyogina giveiveimeya. Badi meIsileli ibeu koyona wagaine ani giveimeya toyogina ke giludobodi. Aku imi keke meIsileli ani, kai wa yami atuvefaila taumiyavo wana awaawaegemi Banae wagaine aga Banae yana nuwakalikali wagaine wana miyamiya. Aku kai yami vetumagana wana segena, aga au kadu imi gina ludobomi.

²³ Aku meIsileli faidiya ani kai ina nuwawilana ada ina vetumagana Keliso wagaine, aga Yaubada kaduwe gina vagaule-vagiledi ke Banae wagaine nodi ina veyoo-tamwai-vagila, anafaiweya ai-nai olive lagana iyogovefose-vagilena ai melamelala wagaine ke nodi itaboluga. Faina Yaubada anafata gina yogovefose-vagiledi.

²⁴ Faina ai olive melamelala ani badi meIsileli yadi ai ada badi laga-moena, e ada badi ad-ifaiweya ina maduavi tova-nai gina yogovefose-vagiledi. Aku imi keke meIsileli yami ai ani olive walawala, ada ai-nai wagaine-deya giludobomi aku giavimi ai-nai melamelala wagaine, e ada maita vitana wana avi ke wanatabo-tamwai.

Yaubada Banae Tonuwakalikali matatabuda wagaideya.

²⁵ Tubuiyakuweyavo, nuwanuwaku Yaubada yana nuwanuwa tuwaina gisewavuyena aku tova malinai giivemogatalina ani wana alamanena. Taidei wagaine keke wa yami

nuwalaka badi meIsileli wana itatagodi vaita imi wakaiwabusegedi. Yana nuwanuwa-nai ani taide anafaiweya. Badi meIsileli-dina Yaubada giawaegedi ke taudiyavo yadi debai toyoga ina muliyedi ani keke gina awaegedi inamiya-vagata anafaiweya. Badiyavo yadi asekuga-nai gina miyamiya anafaiweya analaba badi keke meIsileli ani adigavaiyei Yaubada givenuwadadanedi yana yoo wagaidiya inalukuyabu.

²⁶ E ada meIsileli matatabudi Yaubada gina kibababaledi. Anafaiweya Yaubada yana vona Buki Tabu wagaine ivetokilumina ani gina yegemona velemono, givona,

“Melala lakaina Saiyoni** wagaine-deya Tokibababala gina yegemona.

Banae ani Iyakobo yana tubudelideli** gina kivenuwaviladi e ada yadi dewa koyodi ina segedi.

²⁷ Ada ida yaku veyavo anawai evaguna ganasena wagaidiya ke nodi ana veyavo, ada yadi koyona gana vaiyavuledi.”†

²⁸ E ada malinai meIsileli Yeisu Keliso anavaleya iwakana idibusoyogena ani badi Yaubada nibainavo. Aku wada yadi dibusoyoga ani imi keke meIsileli yami iwakana, faina amikibababala anawai giyavuna ke Yaubada yana nuwakabubu

** **11:26** Yegana-nai ‘Saiyoni’ ani melala lakaina Yelusalema anayegana anavelu. ** **11:26** Iyakobo yana tubudelideli ani meIsileli. † **11:27** Ais 59:20-21, Ibel 8:8-12

givelemi. Aku tuwai-moena Yaubada givon-adabadaba meIsileli tamadiyavo nagona** wa-gaidiya faina, badi meIsileli malinai imiyamiya ani aimo ginuwakabubuyedi.

²⁹ Faina kai Yaubada kaliva gina venuwadadanedi ke yana nuwakabubu gina veledi yana gugai faina, ani keke gina nuwavila aku yana venuwadadana ke yana nuwakabubu ani au inamiya-vagata. Keke gina nuwavila ada yana venuwadadana gina yaweli o kai yana nuwakabubu gina vaiyewe.

³⁰ Tuwaina imi keke meIsileli ani Yaubada yana nuwanuwa wadibusoyogena, aku malinai imi Yaubada yana nuwakalikali wanuwagana badi meIsileli yadi dibusoyoga faina.

³¹ E ada kaduwe anafaiweya, badi meIsileli malinai Yaubada idibusoyogena e ada imi aminuwakalikali wanuwagana wagaine, badiyavo kaduwe adinuwakalikali ina nuwagana.†

³² E, kaliva moyaida Yaubada yana veimeya kagadibudibusoyogena faina, Banae giseda ke vaita yada gadibudibusoyoga gikali-balawalilivugida e ada yogoyogodeyavo kamiya. E ada ime meIsileli ke imi keke meIsileli ani moyaida nuwada gina malina vaita ideyavo ani tokoyona, e ada anafaiweya gina nuwakalikaliyeda.

Yaubada anaawadavadava.

³³ Keke kanavona! Vona velemono Yaubada Tonuwadoga!

** **11:28** MeIsileli tamadiyavo nagona ani Ebelaamo, Aisake ke Iyakobo. † **11:31** Lom 10:19, 11:11,14

Tova matatabuna yana nuwauya giseyege-
monena
yana gugai wagaidiya, ada
givevenuwadadana iwaka-vagaina!
Yana dewa vuvudi ani keke seyana gaito
anafata gina alamane.

34 “Gaito KAUYEYA yana nuwanuwa gialamane?
Gaito Banae anatokivetunuga? Keke tamo!” †

35 “Gaito gavana tamo Yaubada gimaduvene
ayo gilubodana Bana gida laufata? Keke tamo
gaito.” †

36 Faina gaitoma moyaidi ani Banae nimane-deya
iyegemona ke yana toyogina wagaine
imiyamiya,
ada yadi miya ani Banae faine.†
Yaubada kana awadavadavana tova
matatabuna keke anaebalauyabu. Ika
anafaiweya.

12

Vebolavoi wayawaidi.

1 Tubuiyakuweyavo, vona velemonoena Yaubada
yana nuwakalikali lakai-vagaina wagaideya!
Taidei faina gavonavagadonemi ke taumiyavo
wana sesemi Banae matane vaita vebolavoi
aku wayawaimi. E, wana awaege-yabumi
Banae wagaine e ada seseliyemi Banae faine
wana miyamiya ke gina vemwamwala faimiya.†
Taidei oduodu anawai-nai gilubodami.

2 Keke wana awaegemi babi ananuwanuwa
wagaidiya, ada kaduwe kaliva iawaawaegedi

† 11:34 Ais 40:13, 1Kol 2:16 † 11:35 Iyob 41:11 † 11:36 1Kol
8:6 † 12:1 Lom 6:13

nuwanuwa-dina wagaine ani keke wana gaveuveuledi. Aku aiyada taumiyavo wana awaegemi Yaubada wagaine ke yami nuwanuwa gina kiveevagudi.[†] Taidei wagaine yami dewa gina sevedavedamadi ke ina veiwaka, e ada amifaiweya wana awavelemoenayena gavana Yaubada nuwanuwana wana gugaiye. Tainei, wana alamanena gavana iwakana ada gavaiyamu Yaubada wana kivemwamwali, ada kaduwe wana alamanena gavaiyamu wanadewa Banae yana nuwanuwa anafaiweya.

³ Yaubada wa yana nuwadoga givenuwadadaneku ke gaveafositolo faine, e ada imi seyana seyana wagaimiya gana ifuifufu. Keke gida luboda nuwainageniya tauni una kilakaini ke unavona, “Iya kaliva lakaiku,” aku wa ya nuwanuwa tunutunugina tauni fainiya una nuwanuwa. Aku ya vetumagana-nai Yaubada giveleni ani anatubuga anafaiweya una nuwenuwena. E, au taidei wagaine wa ya venuwadadana tunutunugina tauni una nuwenuweni.

⁴ Ide seyana seyana vovoda seyana aku anatalai moyaina, ada talai-dina yadi gugai tulina tulina.

⁵ E ada au ide moyaida ani Keliso nodi kaveseyana wagaine, ide Bana vovona seyana kamiyamiya. Ide nodi kaveyoo-tamwai e ada anafaiweya gabu seyana wagaine ina, tama, novu, natu ani seyana seyana adiivi wagaine imiyamiya ani keke meyameyaganina talai seyana miyamiyadakana gina miyamiya

[†] 12:2 Efes 4:22-24, 5:17

tubuiyanavo wagaidiya.[†]

⁶ Ide seyana seyana adafaiweya gugai tulina tulina kana gugaiyedi anafaiweya adavutuvutuga Yaubada yana nuwadogeya giveleda, e ada wa yada idibumwaiga kana vegugaiyedi. Kai badi gavega adivutuvutuga ina falofisai, aga gilubodadi Yaubada yana vona ina awamogatalena gavana Aluwaluwa Tabuna giawaveleveledi yadi vetumagana anaetowava anafaiweya.

⁷ Kai badi gavega adivutuvutuga toleme, badi gilubodadi ina lemeleme iwakana. Kai badi gavega adivutuvutuga tovewala, aga badi ida vevelele iwakana.

⁸ Kai badi gavega adivutuvutuga kaliva ina kiveasevatudi, aga gilubodadi yadi vona wagaidiya ina kiveasevatudi. Kai badi gavega adivutuvutuga yadi lokoloko o kai mani ina veleveledi kaliva-dina ivemaufu giba wagaidiya, aga au gilubodadi wa yadi nuwadoga ina velavelau. Kai badi gavega adivutuvutuga ina vetonagona, aga gilubodadi wa yadi idibumwaiga kaliva ina nagonagoyedi. Ada badi gavega adivutuvutuga tonuwakalikali, aga gilubodadi keke wa yadi nuwakalikali gagana aku kaduwe wa yadi vemwamwala nodi badi nuwakalikali diyavo ina lemelemedi.[†]

⁹ Kai kaliva wana vonena, “Ganuwak-abubuyeni,” aga gilubodami wa aseasemi nodi wana nuwakabubuyena velemoena. Dewa koyona matatabuna wana dibusoyogedi aku gavana iwakana wana kidonena.

[†] 12:5 1Kol 12:12 [†] 12:8 1Kol 12:4-11, 1Pi 4:10-11

10 Tubuiyamiyavo badi wanuwakabubuyedi velemoena anafaiweya, moyaimi nodi wana venuwanuwakabubu.† Ada wa yami vemoimoina tubuiyamiyavo adiyegana wana kikilakaidi.

11 Taumiyavo wana awaege matatabuyemi Kauveya yana gugai wagaine. Keke wana dibusoyoga aku aiyada wa yami idibudibumwaiga wana gugai.†

12 Gavana tamo wanuwavetumaganena wana nuwagana Yaubada wagaine-deya ani wa yami vemwamwala wana bodaboda faine. Ada kai vita ina yegemona wagaimiya aga wana atuvefaila. Tova moyaina wa yami idibumwaiga wana veoveola.†

13 Kai badi gavega Yaubada yana yoo wagaidiya ivemaufu tamo gavana wagaine, aga yami giba wagaine wana lemedi. Wakawaka wana sivaivaidi yami manuweya ke wana itaveyabidi.

14 Kai badi gavega ina kiveuloulolonimi faina imiyavo Keliso yana kalivayavo, aga keke wana alatabutabuyedi aku aiyada wana awanuwakabubuyedi.†

15 Badi gavega imwamwala, nodi wana mwalavaisedi. Badi gavega itagitagiya, nodi wana tagiyavaisedi.

16 Matatabumi wana veyavo e ada nuwanuwa seyana wagaine wana miyamiya. Keke taumiyavo wana kikilakaimi evona kaliva ina itaitalaka wagaimiya aku aiyada wa yami nuwaobu wana sefaga ke kaliva-kavokavovo

† 12:10 1Pi 1:22 † 12:11 Kol 3:23 † 12:12 1Tes 5:16-18 † 12:14 Mad 5:44, Luk 6:28, 23:34

nodi wana luluveyau. Keke taumiyavo
wa yami nuwalaka wana nuwenuwemi vaita
alaalamanimiyavo.†

¹⁷ Kaduwe, kai kaliva ginadewa koyona wa-
gaimiya, aga gilubodami keke wanadewa laufata
koyona wagaine. Aku wanamadu nuwanuwayena
gavadewa iwakana analauboda e ada wanadewa
tunutunugina moyaidi matadiya.†

¹⁸ Kai amifaiweya kaliva moyaidi nodi
wanamiya kukuya wagaine, au tainei
anafaiweya wanamiya.

¹⁹ Tubuiya aseasekuweyavo, kai kaliva inadewa
koyona wagaimiya, keke wana miwayaudi o
kai wana nuwanuwa laufata faina, aku aiyada
wana atuegena Yaubada wagaine ke Banae
wa yana nuwakoyo gina lufata wagaidiya. Faina
yana vona Buki Tabu wagaine givona,

“Laufata ani Iya akuveimeya.
Iya Tauku kaliva yadi dewa koyona
gana lufata.
Iya KAUVEYA gavona.” †

²⁰ E ada keke tayuwe anafaiweya wana lufata, aku
aiyada

“Kai nibai mafa gilavuna, aga una vekanina.
Kai meyana gikwakwa, gufa unavele gi-
nayuga.
Kai taidei anafaiweya unadewa wagaine,

† **12:16** Lom 14:19, Fip 2:2-3 † **12:17** 1Tes 5:15 † **12:19** 2Vei
32:35, Ibel 10:30, 2Tes 1:6

aga yana dewa-nai koyona ginaduna ada gina vovomumu.” †

²¹ Kai badi gavega inadewa koyona wagaimiya ke yadi dewa koyona wana fatana, tainei koyona-nai giveiveimeyemi. Taidei faina gilubodami imi biyavo-dina wana dewedi iwakana e ada koyona-nai wana toyogisegena.

13

Kabemali yadi veimeya kana matawalewalevedi.

¹ Aku nuwanuwaku toveimeya faidiya gana ifuifufu. Yaubada Banae kabemali ke toveimeya tulina tulina gikikilakaidi. Keke seyana tonagona gida vetonagona tauna yana nuwanuwa wagaine, aku Yaubada-menai kaliva veimeya giveleveledi. E ada moyaida gilubodada taudeyavo kana awaegeda kabemaliyavo ke toveimeyayavo yadi veimeya wagaidiya ke kana matawalewalevedi.†

² Yaubada badi yada toveimeya gisedi faina, gavega toveimeya yadi veimeya ina dibusoyogedi, aga ina anafaiweya badi kaduwe Yaubada yana veimeya idibusoyogena. Biyavo-dina taidei anafaiweya idewadewa ani taudiyavo adimatavuloga ina talavaina.

³ Faina kabemaliyavo ani keke ebamatauta kaliva-dina wagaidiya idewa iwakana, aku kaliva-dina idewa koyona ani badi velemoena kabemaliyavo imatamatausedi. Gavaiyamu, o

† 12:20 Vona 25:21-22 † 13:1 Tai 3:1

nuwanuwa ya kabemali keke una matause? Aga unadewa iwakana ada ina awaveiwakaneni.†

4 Faina badiyavo ani Yaubada yana togugaiyavo, ada ifaifaisewa imi yami iwakana faina. Aku kai wanadewa koyona aga au wana matausedi, faina veimeya-nai wagaine kaliva ivematafulogedi ani veimeya toyogina velemoena. Badiyavo toveimeya anaivi keke idavai-kavovo. Tainei kabemali-dina badi Yaubada yana togugaiyavo, badi yana tomiwayaudi e ada badi veimeya anatoiyawela ani ivevewaledi Yaubada yana nuwakoyo ke ivematafulogedi.

5 Tainei faina gilubodami toveimeyayavo yadi veimeya wana matawalewaledi, keke vaita matafuloga anamatauta gaga faina, aku kaduwe nuwafoumiya waalamanena vaita taidei amilauboda Yaubada matane.

6 Kaduwe taidei vuvuna-nai faina, takesi wana sesena e ada toveimeyayavo adileme ina nuwanuwagana. Faina kabemaliyavo ani Yaubada yana togugaiyavo ke yadi tova lakaina iawaawaegena amiitaveyabina wagaine.†

7 Taidei faina gavadewa amilauboda wada dewayena kabemali wagaidiya, ani au wana dewayena. Badi toveimeya adilauboda takesi wada veledi, aga au wana veledi takesi. Badi gavega adilauboda wada vemoimoinedi, aga au wana vemoimoinedi.†

Ide seyana seyana kana venuwanuwakabubu, faina Yeisu yana yewa-vagila givelilivana.

† 13:3 1Pi 2:13-14 † 13:6 Mad 22:21, Mak 12:17, Luk 20:25

† 13:7 Mad 22:21

8 Kai gavana tamo waketowaina ani wana madufatana ke amiketowai-nai gina avaina. Aku amiketowai seyana keke anafaiweya ginaavai ani moyaimi nodi wana venuwanuwakabubu. Badi gavega kaliva inuwanuwakabubuyedi, badi Yaubada yana veimeya matatabuna imulimuliyena.†

9 Faina Yaubada yana veimeya anafaiweya keke unaudo, keke una luvealika, keke una kiyafu, keke una italuvadiga,† ada veimeya velugadi ani veimeya-nai lakaina matatabuna giitavadi ani taidei anafaiweya.

“Kaliva una nuwakabubuyedi
o tauni unuwakabubuyeni anafaiweya.” †

10 Gaito kaliva ginuwakabubuyena aga keke gavana koyona ginagai wagaine. Tainei faina kai kaliva kana nuwakabubuyedi, aga ina bademowa Yaubada yana veimeya matatabuna kaitaveyabiyabuna.

11 Ada gilubodami kaliva wana nuwakabubuyedi, faina taidei tova-nai wagaine kamiyamiya ani waalamanena tova lakaina. Yeisu yana yewa-vagila givelilivana. Tuwaina ime amaduvetumagana Yeisu wagaine ani avona, “Yeisu yana yewa-vagila givelilivana ke gina kibababaleda babi taidei anauloulolo ke ananuwavita wagaidiya.” E ada malinai anavona, “Bademowa yana yewa-vagila givelilivana-mowa ke gina kibababaleda.” Keke

† 13:8 Mad 22:39-40 † 13:9 Iyeg 20:13-17, 2Vei 5:17-19,21

† 13:9 Vei 19:18

tova manamanawena ada ginaelai faina, keke wanamiya anafaiweya kaliva idaudau, aku kaliva bademowa dauya-deya ienoviladi anafaiweya, imi wana mididi ke wana itaitaboda.

¹² Bademowa bogi anatova giavavaina aku tova kabisona mala gina lavuna. Tainei faina dewa yuyuvana kana segedi aku dewa iwakana malina anafaiweya kana osedi. Faina dewa malina ani anafaiweya gaviya analokoloko, ada ide Yeisu yana tolugaviya gina lemeda ke kana mididi toyo-gina.[†]

¹³ Idayavo malina anakalivayavo, ada gavadewa adalauboda ani kana gugaiyedi. Keke gufa toyogidi kana yuyuga[†] aimo nuwada gina luvevoganidi e ada dewa koyona kana faifaisewadi. Keke vovoda kana awaegge-kavokavovodi, keke kana gadawedawelo, keke kana gavekwavekwageya, ada kaduwe keke gaito wa yana giba iwaka-moedi o kai gaito anayegana lakaina kana veitaveluveyedi ke kana agougedi.

¹⁴ Aku yada Kauveya Yeisu Keliso wagaine kana veigavu. Gilubodada keke maita vovo ad-inuwanuwa luluvadigadi kana nuwanuwayedi ayo koyona kana faifaisewadi.[†]

14

Keke tubuiyamiyavo wanavona venuvenuwadadanedi aa o kevakeva o kai yadayada lakaidi adiitaveyabina faina.

¹ Aku tubuiyakuweyavo, kai badi gavega taudiyavo iawaegedi Yeisu Keliso wagaine aku

[†] **13:12** Efes 6:11 [†] **13:13** Efes 5:18 [†] **13:14** Gal 5:16

yadi vetumagana aimo keke toyogina, aga au wana vogauledi† ke inaluku yami yoo wagaine. Aku tova-nai wana vogauledi aga keke nodi wana vevonavona yadi nuwanuwa tulina tulina faidiya.

² Waitana, tovetumagana tufodi nuwadi gimalina e ada ivonaga, “Aa matatabuna ke kevakeva ani Yaubada yana nuwakabubu ide faideya, ada adafaiweya matatabuna kana kanikanidi.” E ada ikani-kavokavovo. Aku tovetumagana tufodi yadi vetumagana kabekabebena, ada keke nuwadi gidamali kai Yaubada kevakeva anakani giawaveiwakanena o kai keke, e ada keke kevakeva ida kanikani aku aa gaga inakani.**

³ Aku badi ikani-kavokavovo ani keke gida lubodadi ina itatagodi badi tovetumagana-dina keke ida kanikani. Ada badi tovetumagana-dina keke ida kani-kavokavovo ani keke inavona venuvenuwadadanedi badi ikanikani. Faina bademowa Yaubada Tauna yoo-dina givagauledi ke iluku yana yoo wagaine.

⁴ Imi keke badi kaliva-dina adi-toveimeya, ada keke gida lubodami wanavona venuvenuwadadanedi vaita badi tokoyona. Badi aditoveimeya Yaubada anakaibemowa, ada Bana anakaibe analauboda yana togugai yana faisewa gina galuvaluvana kai

† 14:1 Lom 15:7 ** 14:2 Paulo givonavona meIsileli tovetumagana aimo keke ida kumaga yadi vetumagana wagaine ani faidiya, biyavo-dina inuwanuwa vaita tuwaina Yaubada yana veyavo gimadububuna wagaidiya ani anaveimeya-dina aimo ida mulimuliyedi. Badi aimoina-mowa keke nuwadi gidamali vaita valeya iwakana ani keke adigiduwa tuwaina-deya nodi gida lutamwai.

iwakana o kai koyona.[†] Ada kai yana togugai-nai kevakeva gikanikani o kai keke, au gina mididi toyogina, faina Yaubada anafata gina lemelemena ke gina mididi toyogina.

⁵ Kaduwe waitana, tovetumagana tufodi yadi nuwamamala yadayada seyana faine ani taidei anafaiweya ivonaga, “Taidei yadayada-nai ani yadayada lakaina Yaubada anaawadavadava faina aku mali yadayada ani keke.” Aku tufodi ivonaga, “Yadayada matatabuna adiita seyana ke yadayada-dina wagaidiya Yaubada kana awadavadavana.” Nuwanuwa tulina tulina aku au gilubodana kaliva seyana seyana gavaiyamu gida venuwadadana ke tauna tauna faine gida veimeya.

⁶ Kai badi gavega inavona, “Taidei yadayada-nai lakaina Kauveya anaoduodu faina,” tayuwe anafaiweya inavona faina nuwanuwadi Kauveya ina vemoimoinena. Ada badi gavega aa matatabuna ke kevakeva nodi ikani-kavokavovo, badi wa yadi vemoimoina Kauveya wagaine ikanikani, faina ialamanena vaita Yaubada Banae gaitoma matatabuna aditoavetavetala, e ada ivonavona vesiule faidiya. Aku badi gavega kevakeva anakani ivevelovogena, ani badi wa yadi vemoimoina Kauveya wagaine keke kevakeva ida kanikani, ada kaduwe ivonavona vesiule Yaubada wagaine gava aa ikanikani faine.

⁷⁻⁸ Yaubada kana vemoimoinena velemonoena yada dewa matatabuna wagaidiya, faina kai wayawaida kana miyamiya, aga keke gida luboda yada nuwanuwa gagana kana faifaisewadi aku

[†] 14:4 Mad 7:1

taudeyavo kana awaegeda Kauveya wagaine. Kai kana alika, kaduwe taudeyavo kana awaegeda Banae nimane.† Yada miyami ke yada alika ani keke taudeyavo kada veiveimeye, aku ide Kauveya yana kalivayavo ada Banae giveiveimeyeda.

9 Taidei vuvuna-nai faine Keliso gialika ke giyawa-vagila, e ada badi gavega bademowa ialika ada kaduwe gavega aimo wayawaideyavo kamiyamiya ani au matatabuda Banae ada-Toveimeya.

10 Gavaiyamu, o uvetoveimeya ada tubuiya yana dewa uvona venuvenuwadadanena? O vaita gaito e ada tubuiya uitaitatago? Faina aimo matatabuda kana mididi Yaubada matane yana vonayavuga wagaine.†

11 Anafaiweya KAUYEYA yana vona vetovetok-ilumina Buki Tabu wagaine givona,

“Iya wayawaiku gamiyamiya anavelemoena anafaiweya,
Iya matakuya kaliva matatabuna wa yadi ve-moimoina
ina iboula-mowa inavona, ‘Oyeni vona vele-moena Yaubada.’ ” †

12 E, ada kaalamanena ide seyana seyana ani taudeyavo yada dewa faidiya kana awatalatalaina Yaubada wagaine.†

† 14:7-8 1Tes 5:10, Fip 1:21

† 14:10 Gug 17:31, 2Kol 5:10

† 14:11 Ais 45:23, Fip 2:10-11

† 14:12 1Pi 4:5

Keke tubuiyamiyavo wanagadi inabe koyona wagaine.

¹³ Taidei faina, keke tamo tova kaduwe tubuiyadeyavo yadi dewa kanavona venuvenuwadadanedi vaita ide yadi tovevonayavuga. Aku aiyada gilubodada kana venuwadadana vaita keke tamo ebabeu o kai ebasiveyewa kanasei e ada tubuiyadeyavo tovetumagana gina nagoyedi ke yadi vetumagana Yaubada wagaine inasege.

¹⁴ Iya yaku Kauveya Yeisu nodi aveyoo-tamwai ke wa yana veimeya gavona. Gaalamanena vele-moena vaita keke tamo aa o kai kevakeva ani keke yegayegana Yaubada matane e ada Banae awata gidasei faidiya. Aku kai gaito seyana gina nuwanuwa vaita aa seyana o kai kevakeva seyana ani keke yegayegana Yaubada matane, aga au wada velemoena koyona banae wagaine.†

¹⁵ Aku kai oye aa-nai una kanikanina aku tubuiya-nai gina itani ke nuwana ginavita, ina ya dewa-nai wagaine ani keke tubuiya uda nuwakabubuye. Au nuwana ukivevitana. Una nuwaududuna, bana kaliva-nai faine ani Keliso gialika. Auwe, amiga wagaine keke tubuiya una vebeu koyona wagaine e ada yana vetumagana Keliso wagaine una yaweli.†

¹⁶ Kai dewa seyana wanuwanuwayena vaita iwakana aku mali kaliva inuwanuwayena vaita wada dewa koyona, aga keke una faifaisewa aenanai ina awavekoyoyeni ke ina ifufu-dadaneni vaita dewa koyona wagaine uawaawaegeni.

¹⁷ Faina Yaubada yana ebaveimeya wagaine

† 14:14 Gug 10:15 † 14:15 1Kol 8:11-12

ani kani ke yuga keke gaitoma lakaidi, aku aiyada gaitoma lakaina ani kanadewa yegayegana, wa yada nuwaniwalova kanamiya, ada kaduwe Aluwaluwa Tabuna wagaine kana vemwamwalamowa.

¹⁸ Ada badi gavega taidei anafaiweya idewadewa yadi awaega Keliso wagaine, ani Yaubada ikivemwamwalina ada kaduwe kaliva iawaveiwakanedi.

¹⁹ E ayo taudeyavo kana awaega-moeda kukuya wagaine, ada gavana kaalamanena kukuya gina seyegemonena ani kana gugaiyena.[†] Ada kaduwe gavana tubuiyada tovetumagana yana vetumagana gina iyogona ke ina toyogina ani kana gugaiyena, kai yada vona o kai yada leme wagaidiya.

²⁰ Aa ke kevakeva matatabuna ani yegayegadi Yaubada matane ada iwakadi kani faina. Aku kai aa seyana o kai kevakeva kana kanina ada taidei wagaine tamo gaito kana vebeuna, aga keke gida luboda kanakani. Keke aa o kevakeva wakanikanina wagaine Yaubada yana gugai tubuiyamiyavo wagaidiya gigugaiyena ani wana kivekoyo.

²¹ Kai kevakeva wana kanikani o kai waini wana yuyuga o gavadewa wadewadewayena aku meyameyaganina tubuiyami wana vebeuna koyona wagaine, gilubodami taidei dewa-dina wana vedomobubusedi.[†]

²² Tainei faina kevakeva o kai waini o kai tabu tulina tulina, gavaiyamu wanuwanuwa ani imiyavo ada Yaubada nodi wana ifufuyena. Keke kaliva nodi wana vevonavona faidiya. Ide

[†] 14:19 Lom 12:18 [†] 14:21 1Kol 8:13

gavega taudeyavo matadeya kanadewa iwakana ada muliya adalutovona dewa-nai faina kadu iwakana, tainei ebavemwamwala faideya.

²³ Aku kai wa yada nuwakila aku auwe kanakani, wada velemonoena Yaubada matane ide wa yada koyona, faina keke wa yada vetumagana kada kanikani aku wa yada nuwakila nodi. Ada gavadewa kana dewayena aku keke vetumagana wagaine gida vevuvu, tainei ani koyona.

15

Keliso yana dewa kana mulimuliyena, Banae Tauna giawaegena kaliva yadi iwakana faina.

¹ E ada ide gavega yada vetumagana toyogina Yeisu Keliso wagaine ani gilubodada keke taudeyavo gagana faideya kana nuwanuwa. Kai tubuiyada seyana yana vetumagana keke toyogina e ada tova moyaina ginuwalugaluga, givona, “Gavana gadewadewayena ani gavaiyamu, iwakana o kai koyona Yaubada matane?” aga banae keke kana itatago aku aiyada wa yada nuwakabubu kana atuvefailena.

² Gilubodada ide seyana seyana kana nuwanuwa kaliva faidiya, ada gavana iwakana faidiya ani taidei anafaiweya kana dewedi e ada badi ina vemwamwala ke yadi vetumagana kana yogona.[†]

³ Wana itana, Keliso yada ebaita gisena. Banae gavana gigugaiyedi ani keke Tauna anakivemwamwala faina aku nuwanuwana Yaubada gina kivemwamwalina. Taidei yana

[†] 15:2 Lom 14:19, 1Kol 10:24

dewana-nai faine ivetokilumina Buki Tabu wagaine, ani Keliso givona Yaubada wagaine, givona,

“Kaliva gavega iawavekoyoyeni ani awavekoyo-dina Iya kaduwe ganuwagana.” †

⁴ Vona-dina moyaina tuwai-moena ivetokilumina Buki Tabu wagaine ani ide adakivetuvetunu faina.† Ada alamana-nai kavaivaina Buki-nai anaveyawa wagaine, ani gilemelemeda ke kana atufefaila ada kana asevatu yada awaega Keliso wagaine, e ada Yaubada kana nuwawetumaganena ke gavana givon-adabadabayena gida veleda ani velemono kana nuwagana.

⁵ Yaubada Banae gikivemeyameyaganida ke kana atufefaila, ada Banae-nai gikikiveasevatuda. Ada gaveoveolena ke moyaimi gina lemelememi ke wanamiya seyana anafaiweya Yeisu Keliso yana dewa.

⁶ E ada yami nuwanuwa ke yami vona au seya-moena wagaine Yaubada anayegana wana kilakaina, Banae yada Kauveya Yeisu Keliso Tamana.

Keliso ani meIsileli ke badi keke meIsileli adi-Tokibababala.

⁷ Keliso bademowa givagaulemi anafaiweya, imi kaduwe nodi wana vevagavagaulau, e ada kaliva ina itami wadewadewa anafaiweya ada Yaubada anayegana ina kilakaina.

† 15:3 Sam 69:9 † 15:4 1Kol 10:11

⁸ Faina gana vonemi ani Keliso gielai ke give-togugai meIsileli faidiya e ada Yaubada yana vonadabadaba tamadiyavo nagona wagaidiya gina veawavelemoena. Taidei wagaine kaliva nuwadi gina malina vaita Yaubada yana vona ani vona velemoena.

⁹ Kaduwe gielai ke badi keke meIsileli Yaubada anayegana ina kilakaina yana nuwakalikali wagaidiya faina. Anafaiweya Deivida givetokiluma Buki Tabu wagaine, givona,

“Yaubada, gana awadavadavani badi keke meIsileli adimwatuguya, kaduwe ayegana gana kweliye davadavana.” †

¹⁰ Kaduwe givona,

“Imi keke meIsileli ani Yaubada yana kalivayavo badi meIsileli nodi wana vemwamwala.” †

¹¹ Kaduwe ifufu seyana givona,

“Imi keke meIsileli moyaimi KAUVEYA wana awadavadavana. Kaliva matatabumi fafali seyana seyana wagaidiya wana kweli davadava wagaine.” †

¹² Kaduwe Yaubada yana falofita Aiseya ani Keliso yana ela faina gimaduvonaye-vagaina givona,

† 15:9 2Sam 22:50, Sam 18:49 † 15:10 2Vei 32:43 † 15:11 Sam 117:1

“Iyese** yana tubudelideli wagaine Kaliva
seyana** gina yegemona.
Banae-nai Yaubada gina kivemididina ke
gina vetoveimeya badi keke meIsileli wa-
gaidiya,
ada Banae wagaine wa yadi nuwavetuma-
gana ina tunutunuvala.” †

13 Yaubada vonadabadaba tulina tulina
giveleda ada Bana wagaine kanuwanuwavetu-
maganena ani adanuwakabubu kana nuwagana.
E ada gaveoveola wana vetumaganadonau
ke Banae gina kivemwamwalimi ke
gina kivenuwaniwalovimi, ada Aluwaluwa Tabuna
yana toyogineya yami nuwavetumagana
ginamaga gina aiwaiwana.†

*Paulo ani Keliso yana afositolo gifaisewa
badi keke meIsileli faidiya.*

14 Tubuiyakuweyavo, Iya ganuwaveyalaina
vaita yami dewa iwaka-vagina, yami alamana
Yeisu Keliso faina ani lakaina, ada amifaiweya
nodi wana vekivetuvetunu.

15 E aku nuwanuwaku gana kivenuwaududumi
gaitoma tufodi faidiya, tainei faina wa yaku ase-
vatu gavetokiluma wagaimiya. Faina Yaubada
yana nuwadogeya givenuwadadaneku

16 ke Iyayeku ani Yeisu Keliso yana togugai
badi keke meIsileli faidiya, e ada Yaubada
yana valeya iwakana gaawaawamogatala

** 15:12 Iyese ani Kini Deivida tamana.
seyana' ananuanuwa ani Banae Mesaiya.

** 15:12 'Kaliva
† 15:12 Ais 11:10

† 15:13 Lom 14:17

wagaidiya. Taidei yaku gugai-nai vaita Yaubada yana veyavo anatovegugai anafaiweya, e ada badi tovegugai-dina kaliva yadi vebolavoi ialialiyedi Yaubada matane anafaiweya, badi keke meIsileli aku taudiyavo iawaegedi Yaubada wagaine ani badi vaita yaku vebolavoi Banae wagaine. Ada Aluwaluwa Tabuna wagaidiya gimiyamiya ke gikikivetabudi, e ada Yaubada gikikivemwamwalina ke vebolavoi-nai giawaveiwakanena.

¹⁷ Taidei faina wa yaku gakaikai gavemwamwala lakaina, faina Yeisu Keliso yana toyogineya yaku faisewa Yaubada faine ani wa guwana.

¹⁸ Mali kaliva yadi gugai faina ani keke tamo gavana ganavone, aku gavaiyamu Keliso gitoyogiveleku ke gafaisewana, tainei gagana gana ifufuyena. Yaku gugai-nai guwana ani malinai badi keke meIsileli taudiyavo iawaegedi Yaubada wagaine ke imatawalewaleyena. Badiyavo ani yaku vona inogalina ke yaku dewa iitana,

¹⁹ ada Aluwaluwa Tabuna yana toyogineya iyaiyaya lakaidi ke gugai ebameyasidobodobo gafafaisewadi matadiya.† Yelusalema wagaine-deya gavevuvu ada gabalawalilivuga melala seyana seyana wagaidiya valeyana-nai gaawatalatalainena wagaidiya, gana gayegemona fafali Ililikumu wagaine. E ada yaku gugai Keliso anavaleya iwakana analaumamala faina ani bademowa galuyabuna.†

† 15:19 2Kol 12:12 † 15:19 2Kol 3:5, Gug 19:11-12

²⁰ Ada yaku laumamalanau wagaine yaku nunu seyana ani, gana lumamala gavafafali wagaidiya Keliso keke ida alamane, e ada keke mali tolaumamala yana faisewa gana luvefofo.†

²¹ Taidei anafaiweya yaku dewa, anafaiweya falofita Aiseya givetokilumina, givona,

“Badi gavega wagaidiya keke tamo gaito
Banae yana valeya-nai gida awatalatalaine,
ani badi ina itanuwigana.
Badi gavega Bana valeyana keke ida nogali
ani
biyavo-dina nuwadi gina malina Banae
faine.” †

Paulo ginuwavetumagana ginanau Loma wagaine.

²² E ada mali fafaliya galulumamala badi gavega Yeisu valeyana keke ida nogali wagaidiya faina, tova ke tova yaku ela wagaimiya gisiveyewewana.

²³ Aku tova malinai ani yaku faisewa bademowa galuyabuna taidei fafali-dina wagaidiya, ada kaduwe malamala gavaiyei bademowa givavidi wagaidiya nuwanuwaku ganaelai wagaimiya,

²⁴ e ada gavatoveya gananau Sipeini anafafaliya, ganuwavetumagana vaita ganaela gana madubodami, ada wa yaku vemwamwala imi nodi kanamiya. E ada aimo-yo yami lema nodi wana kisegeku kadu gananau Sipeini.

† 15:20 2Kol 10:15-16 † 15:21 Ais 52:15

25 Aku nago-moena gananau Yelusalema ada Yaubada yana kaliva tabutabudiyavo gana lemedi.

26 Faina tovetumaganayavo Masedoniya ke Akaiya adifafaliya imiyamiya ani yadi nuwaawaega wagaine yadi nuwakabubu isena[†] biyavo-dina ivefanifani Yaubada yana kalivayavo adimwatuguya Yelusalema wagaine.

27 Badi taudiyavo yadi nuwaawaega wagaine ifaisewana, aku kaduwe gilubodadi ina tutulina. Faina badi meIsileli wagaidiya ani badi keke meIsileli inuwagadi gaitoma iwakadi aluwaluwadi yadi miya iwakana faina. Taine faina badi keke meIsileli ani anafaiweya adiketowai lakaina gimiyamiya Isileli wagaidiya, e ada adilauboda ke meIsileli badi tovetumagana ina lemedi tufona babi anagaitoma iwakadi wagaidiya yadi miya faina.[†]

28 Ada tova-nai bademowa adinuwakabubu taide ganasena ada gugai taidei gana luyabuna, e au tunutunugi-moena gana tauya Sipeini faina, ada yaku nau-nai wagaine gana ilovau wagaimiya ke gana madubodami.

29 Ada gaalamanena tova-nai ganaelai wagaimiya, Keliso yana nuwakabubu lakai-moena ginamaga gina aiwaiwana moyaida wagaideya.[†]

30 Tubuiyakuweyavo, yada Kauveya Yeisu Keliso anayeganeya ada Aluwaluwa Tabuna yana nuwakabubu giveleda wagaine, gaveove-ola toyogina wagaimiya vaita wa yami atuvefaila wada veolavaiseku Yaubada wagaine faikuya.[†]

[†] 15:26 2Kol 8:1-2 [†] 15:27 1Kol 9:11 [†] 15:29 Lom 1:11

[†] 15:30 Kol 4:3, 2Tes 3:1-2

31 Wana veoveolena ke gina kibababaleku badi gavega Keliso idibusoyogena Yudiya anafafaliya ani wagaidiya-deya. Kaduwe wana veola ke Yaubada yana kalivayavo tabutabudi** Yelusalema wagaine imiyamiya ani adinuwakabubu keke ina dibusoyoge aku wa yadi vemwamwala ina vaina.

32 Taidei anafaiweya wana veoveola faikuya e ada kai Yaubada nuwanuwana anafaiweya, aga wa yaku vemwamwala ganaelai wagaimiya ada gana veyawai, ada nodi kana miyamiya ke taudeyavo kana kikivetoyogida.

33 Yaubada Banae nuwaniwalova giveleveleda ani imi nodi wana miyamiya. Ika, anafaiweya.

16

Paulo yana nuwakabubu tubuiyanavo imiyamiya Loma wagaine.

1 Tubuiyakuweyavo, nuwanuwaku gana ifufuyemi novuda Fibe faine, banae gaawaveiwakanena. Bana givedikoni toekalesiya imiyamiya melala Senikeliya wagaine ani wagaidiya.

** 15:31 Vona Giliki wagaine vona-nai 'saints' kakivilana 'Yaubada yana yoo' o kai 'Yaubada yana kalivayavo' ani ananuwanuwa taide anafaiweya. Badi taudiyavo iawaegedi Yaubada wagaine, e ada badi yana yoo tabutabudiyavo. Veyavo Anawai Tuwaina wagaine ani vona-nai iveyewana badi meIsileli ada kaduwe kaliva tufodi, anafaiweya Mosese ada Ebelaamo. Aku Veyavo Anawai Evaguna wagaine ani ananuwanuwa vaita Yaubada yana yoo ani badi Yeisu ivetumaganena, kai badi meIsileli o kai badi keke meIsileli.

² Ada kai Loma wagaine gina yegemo aga wa yami vemwamwala wana vagaulena ke wana itaveyabina, faina bana novumi Kauveya yana yoo wagaideya. Imi yana kaliva tabutabumiyavo faina, gilubodami wanadewa anafaiweya. Kai vavine-nai gavana tamo yana nuwanuwa aga wana lemena, faina mine-nai yana leme lakai-vagaina wagaikuya kaduwe kaliva moyaidi wagaidiya.

³ Yaku nuwakabubu wana inanana Filisila ke moganedi Akwila[†] nodi wagaidiya, badi Iya nodi avetogugai Yeisu Keliso yana gugai wagaine.

⁴ Tova seyana badi adiselu ialamanena kabisona ida gilagi, aku auwe yawaidi iawaegena ke yawaiku ikibababalena. Tainei faina gavesiule lakaina wagaidiya. Ada keke Iyayeku gagana aku kaduwe badi keke meIsileli tovetumaganayavo adiyoo moyaidi ivesiule.

⁵ Kaduwe yaku nuwakabubu tovetumagana wagaidiya, gavega ivagavagauta Filisila ke moganedi nodi yadi manuweya.

Epinito wana vonena yaku nuwakabubu wagaine. Banae tubuiya aseaseku, kaliva-nai Eisiya anafafali wagaine gimaduvetumagana Keliso wagaine.

⁶ Kaduwe yaku nuwakabubu Meli wagaine, banae gifaisewa toyogina faimiya.

⁷ Yaku nuwakabubu Adulonaiko ke Yuniyasi adiselu wagaidiya, badi yaku yoo meIsileli, tuwaina Iya badi nodi amiyamiya deliya Yeisu Keliso faine. Kaliva-dina adiselu

[†] **16:3** Gug 18:2,26

wa adivemoimoina afositoloyavo matadiya, ada Keliso nodi imadu veseyana aku Iya muliya.

⁸ Kaduwe yaku nuwakabubu Amifiliato wagaine, banae Kauveya nodi kaveseyana ada tubuiyaku velemoena.

⁹ Ubano banae ide nodi kafaifaisewa Keliso faine, ada kadu tubuiyaku velemoena Sitakisi, badi adiselu yaku nuwakabubu wagaidiya.

¹⁰ Kaduwe yaku nuwakabubu Apelesi wagaine, banae uloulolo ginuwagana Keliso faine aku gitoyogitagonea, e ada wa anaawaveiwaka. Ada badi gavega imiyamiya Alisitobulo yana manuweya, ani yaku nuwakabubu wagaidiya.

¹¹ Kaduwe yaku nuwakabubu Elodiyoni wagaine, banae yaku yoo meIsileli. Kaduwe yaku nuwakabubu badi gavega Nakiso yana manuweya imiyamiya, biyavo-dina Kauveya ive-tumaganena ani wagaidiya.

¹² Kaduwe yaku nuwakabubu Talaifina ke Talaifosa wagaidiya, badi vevine-dina adiselu igugai iwakana Kauveya faine. Ada kaduwe Pelisisi wana vonena yaku nuwakabubu wagaine, banae gifaisewa toyogina Kauveya faine.

¹³ Yaku nuwakabubu Lufuso[†] wagaine, banae togugai iwakana Kauveya faine. Ada kaduwe inana badi Iya kaduwe iawavenatuneku, ani yaku nuwakabubu wagaidiya.

¹⁴ Kaduwe yaku nuwakabubu taidei biyavo-dina wagaidiya, Asinikilito, Filigoni, Emesi, Fateloba ke Emasi ada tubuiyadeyavo badi nodi imiyamiya.

[†] **16:13** Mak 15:21

15 Kaduwe yaku nuwakabubu Filologo ke Yuliya wagaidiya, kaduwe Neliusa wa novuna nodi, ke Olimupa, ada Yaubada yana kaliva tabutabudiyavo moyaidi badi nodi imiyamiya.

16 Taumiyavo nodi wana venuwaga wagaine, wa yami nuwakabubu tubuiyamiyavo wana vesiuleyedi. Keliso anatovetumagana adiyoo tulina tulina yadi nuwakabubu iimilina wagaimiya.

Paulo yana vona anaebalauyabu.

17 Aku tubuiyakuweyavo, gavelemi toyogina ada badi gavega vewala tuli-moena ivevewala ani wagaidiya matami gina faifaila. Biyavo-dina yadi vewala keke ida veaigaigabu Keliso anavaleya iwakana nodi, aku vewala-nai wagaine gavekwavekwageya isisilakaina ada ludaka ikikiveyegemonina. Badi kaliva-dina wana velovogedi.[†]

18 Faina badi gavega taidei anafaiweya ide-wadewa ani keke ida faifaisewa yada Kauveya Keliso faine, aku taudiyavo gagana faidiya in-uwanuwa. Bona-itudi digadigagidi ke yadi awayafayafa wagaidiya badi gavega nuwadi keke mamalidi ani ifwayanegenegedi.

19 Aku imiyavo ani moyaidi bademowa valeyami inogalina vaita Keliso wamatawale-waleyena velemoena, e ada gavemwamwala lakaina faimiya. Aku nuwanuwaku wana vetonuwanuwa velemoena e ada dewa iwakadi gagana nuwami gina vaivaina aku dewa koyona faidiya keke wana nuwanuwa.

[†] 16:17 Tai 3:9-10

20 E ada Yaubada Banae nuwaniwalova giveleveleda ani tova kabisona Seitani yana toyogina ginamadu kivekabekabebena ke wana vagatagotagona.

Yada Kauveya Yeisu Keliso yana nuwadogeya gina lemelememi.

Tovetumagana imiyamiya Paulo nodi ani yadi nuwakabubu meLoma wagaidiya.

21 Timoti[†] banae Iya nodi afaifaisewa Keliso faine ani yana nuwakabubu wagaimiya, anafaiweya kaduwe Lukiyo, Yeisoni ke Sosifato, badi yaku yoo meIsileli.

22 Iya Tetiyo leta taidei gavetokilumina Paulo faine, ani yaku nuwakabubu wagaimiya Kauveya anayeganeya.

23 Kaduwe Gaiyasi[†] yana nuwakabubu wagaimiya, bana yana manuweya Iya gamiyamiya, ada tovetumagana adiyoo bana yana manuweya ivagavagauta ani yadi nuwakabubu wagaimiya. Ada kaduwe Elasito[†] banae kabemali yadi mani anatoitaveyabina ke tubuiyana Kwatasi, badi adiselu yadi nuwakabubu wagaimiya. [

24 Yada Kauveya Yeisu Keliso yana nuwadogeya wana miyamiya. Ika anafaiweya.]

Yaubada anaawadavadava.

25 Aku Yaubada kana awadavadavana. Banae-nai anafaiweya yami vetumagana gina kivetoyogina yaku valeya iwakana wagaine. Taidei valeya-nai ani Yeisu Keliso faine gaawaawamogatala. Tuwai-bulubuluna tutuya gavaiyei bademowa kasegedi wagaidiya ada

[†] 16:21 Gug 16:1-2 [†] 16:23 Gug 19:29, 1Kol 1:14 [†] 16:23 2Tim 4:20

gielai malinai, Yaubada yana nuwanuwa gikiveyabina sewasewavuyena,

²⁶ aku malinai giawamogatalena. Taidei valeya-nai ani mamalina giyegemona vonadina wagaidiya falofitayavo ivetokilumina, ada Yaubada miyamiyani-vagaina giveimeya ke yana nuwanuwa sewasewavuyena yana kalivayavo ina awamogatalena kaliva yoo tulina tulina wagaidiya,[†] e ada Yaubada ina vetumaganena ke ina vemoimoinena.

²⁷ Yaubada Banae anakaibe Tonuwanuwa vele-moena ani anayegana kana kilakaina-vagata Banae Yeisu Keliso anayeganeya, keke ginaavai.[†] Ika, anafaiweya.

Iyayeku Paulo

[†] 16:26 Kol 1:25-27 [†] 16:27 1Tim 1:17

Yaubada Yana Veyavo Anawai Evaguna
The New Testament in the Bwaidoka language of
Papua New Guinea
Nupela Testamen long tok ples Bwaidoka long Niugini
copyright © 2024 Wycliffe Bible Translators, Inc.

Language: Bwaidoka

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-11-22

PDF generated using Haiola and XeLaTeX on 22 Nov 2025 from source files dated 22 Nov 2025

b5406fa0-0156-5dfd-bdb9-797516d75cf2